

南

廂

志

南雍志卷第四

事紀四

憲宗純皇帝

乙酉

成化元年春正月壬申典簿廳以師

生廩膳移文戶部會計三月己巳

勅諭兩京國子監

訓見

夏四月丁丑詹事府少詹

事兼北監祭酒司馬恂言官吏丁憂俱以二十

七月起復竝無由服之制考諸經史亦無由服

之文今後監生丁憂於正服之外止與地理遠

近水程革去由服之限俱作虛曠庶幾禮有節

文事有定體而奸弊可革矣

上允之并移文本監著爲令已卯以兵部尚書蕭維
楨等建議本監額設夫隸存留應用外餘者退
歸於所議艱難地方五月戶部申明舊制以監
生八百人過後湖查理黃冊食用夫役俱取諸
本監不敷則取之應天府其所查戶口有誤者
委官徑以上聞秋七月吏部疏凡由考察去任
者移文原籍令有司知會本監遵行之冬十二
月舉人監生詹棚以錦衣衛指揮門達被誣革
爲民上疏自明

詔都察院釋之是年令生員納糧納草納馬等俱

許入監尋令凡納粟等項監生坐堂十年循次
撥歷若中鄉試者通計先年坐監月日撥歷其
未冠願坐監者亦滿十年方許復監

丙戌成化二年春正月追封從祀孔子諸儒未有爵

者董仲舒爲廣川伯胡安國爲建寧伯蔡沉爲
崇安伯真德秀爲浦城伯是年令兩京監生禮
部都察院堂上官公同祭酒一年一次考選其
老疾鄙陋不堪作養者給與冠帶原籍閒住

刻成化三年春二月禮部因助教李仲建言奏准
在京三品以上官子孫許一人送監讀書照監

例出身有志科目者聽若大臣果有勲勞於

國出自特恩錄用者不在此限秋七月乙卯戶科
給事中劉吳言永樂以來朝臣以牽情起用爲
當然非所以明彝倫廣孝道也天順初言官喬
毅嘗奏請罷之今又蹈前非矣合仍前申明如
有保留奔喪奪情者各治以罪

上從之吏部移文本監遵守冬十月改祭酒劉俊爲
南京通政使司左通政俊性通敏踈脫嗜食蛆
蚓令監生家人捕取以充膳他事大率類是物
議非之遂被言官論劾改陞是官後至南京工

部右侍郎致仕

陝西通志載俊致仕後有訪之者見俊躬與木匠同鋸木人以

樸實稱之其實

輕脫非大臣體十一月以翰林院侍讀學士周

洪謨爲祭酒

大學士商輅送祭酒周先生赴南

亦樂手孟子曰得天下英才而教育之三樂也

予少時竊疑於此謂聖賢之學爲已而已何至

以及人爲樂耶後會試南宮辭教職入太學爲

諸生適古廉李先生爲祭酒未數月方興廢舉

墜汲汲以造就人才厚俗敦本爲已任得予輩

至甚喜以謂教由是可施道由是可行於是先

生素所蘊蓄足爲後進矜式者一旦發而出之

以淑諸人大抵其爲教以正心術勵行檢忠君

孝親爲第一義誘掖勸導無間朝夕未幾教以

大行太學之盛遂隱然爲近代稱首予然後知

孔孟及人而樂之言有足徵而因以嘆夫士君

子不仕則已仕於其時得爲祭酒斯所學爲有

用矣越再暮子舉進士與今周先生堯佐劉先

生世英聯名甲科同官翰林久之子承乏

內

關太學之遊浸以闊疎向所有慕於祭酒者時
或見之憂寐而已茲蒙聖恩召自田里至
則世英已為南京祭酒三載遷他官而朝廷
復命堯佐先生代之矣夫以予所風慕而不可
得者二先生相繼得之予寧不為之喜耶先生
以學士遷祭酒固未足為重而予獨深喜其教
可施道可行而所學為有用也矧先生學行老
成蓄而未洩者已二十年茲行領袖儒師表儀
六館推所得以及人使士習丕變文風益振將
來布列中外建功立業垂名宇宙間者皆先生
之徒也審如是先生雖欲不樂於心不可得已
先生促裝就道同官諸君子相與賦詩言別屬
予序因述所以羨慕之意以贈
未審有合於先生之意否也

戊戌化四年春二月祭酒周洪謨言會饌乃

高皇帝成憲歷年遵行以致學規嚴肅生徒勤謹自
景泰中因無柴薪暫且停止其後因循廢弛至

今未復訪得南京抽分廠積有柴薪宜令議復
詔下南京禮工二部計議洪謨又言監生丁憂多
有詐冒今原報父存母亡母存父亡并無祖父
母嫡繼母者其丁憂二十七月俱准坐堂若父
母俱存者第一次丁憂准坐堂二年第二次丁
憂准坐堂一年半若有父母并有祖父母嫡繼
母者第三次丁憂准作坐堂一年第四次丁憂
准坐堂半年所在官司里老保勘庶使無喪者
不詐有喪者不匿矣其在家丁憂者預今申達
咨呈以丁憂之日爲始亦不得出一年之外其

就教復監監生在部聽考日期以六閱月爲率
除考期及往廻水程九閱月准作坐堂餘月日
皆不准諸生告畢姻者有妻歿於家有司先聞
於部以待回娶

上命禮部議以親喪服制無遞減之例惟今監生丁
憂者欺罔卽爲虛曠餘如之

上命照近例行自是凡丁憂事故給假者俱不准坐
堂尋令監生患病一年之外不復監者放爲民
又令監生畢姻者如洪謨所言冬十月戊子吏
部申明舊例監生母得告就雜職十一月乙丑

祭酒周洪謨奏言每年差監生六人解送毛櫬淹滯虛曠以致年久不得出身乞比照廚料事例免差爲便從之丁酉

上以諸臣先後建言

詔下每於會試年多取副榜舉人除授學職二十五歲以上者不准辭避其考滿該陞願會試者從之但年五十以上者不准入試有保舉者銓曹量材授用天下歲貢生提學官考一等者方許與科舉監生願就學職仍嚴試三場始准其納馬納草等項進身及未經科舉監生與年五

十以上者皆不得濫與焉又先因監生積滯不
選

詔許考勤過者再歷事三閱月候選有願就雜流
者從之有不願仕欲歸家者皆與冠帶閑住後
又以侍郎兼學士商輅言三考滿吏取中入流
者少雜職者多而聽選監生自有本等待次若
往就雜職則於三考有妨宜且停止其有給假
依親等監生果有不願入仕者許令具告有司
就彼冠帶閑住皆從之

已
成化五年春三月戶科給事中李森奏言入監

讀書者當由科貢欲停止京官恩廕

詔令三品以上官非年久有政聲者不許濫進夏
六月乙卯以學正鄭惟儉下舍人鄭惟廣克平
蠻賊有功移文賞絹布各一疋乙丑議修理國
子監工部議以南京工部會有物料照例於

內府南京司禮監關填勘合照數關支松竹輓灰
等料於南京龍江瓦屑壩二抽分竹木局并留
守左等衛正五等窯抽領燒煉應用會無物料
行移應天府支給官錢令江寧上元二縣平買
充用其赴工軍餘行南京守備內外官員量撥

及行直隸廬州府轉屬起倩人夫一百名委官督領用工修理其人匠於本部輪班匠內按季摘撥二十名應用秋七月甲申祭酒周洪謨奏請增設東廂房簷下小門一扇以便關鎖防護書籍從之冬十一月癸未北監祭酒陳鑑疏言南北兩監官與在京諸司官遷叙事體未始有異如學正等官曹璉等陞僉事邊寧等陞知府景信等陞長史張福等陞知州魏齡等陞監察御史彼時人知激勸近日陞擢惟有學正江深得陞長史耳復是在部考滿人數且各官自任

教職以來動經二三十年并爲淹滯不無衰老
先年祭酒邢讓雖嘗建言然拘於出身限於考
滿兩監各官一人未拔激勸之典似乎未溥乞
訪各官曾經考滿稱職者不分出身不拘年月
果有才可堪政事量陞長史同知知州以寓激勸
如遇三品以上官會保及本部推舉者亦一體
陞擢

命下吏部行之十二月丁未令各衙門寫本監生
以一年爲滿

庚成化六年春二月辛亥浙江金華縣儒學訓導

虞孟上言天下學校果有廩膳年四十之上累科不第未該貢者查考是實不必挨次准令在前充貢毋令仍前冒年干進以杜前弊南北監生合照洪武至正統年間事例坐監撥歷儲養肄業以待取用如遇大比許於應天順天入試或遇邊務救荒之類不得令坐監之人上馬納糧以越資取用吏部議以監生人衆若照洪武正統事例過於淹滯量爲斟酌以天順八年成化元年二年放回監生行取復監候至成化七年爲

此下有缺文誤字不攷體補

將成化三年以後監生不

分新舊俱照正統年間事例坐堂肄業其撥歷一節除上馬監生有例坐監十年撥歷外其餘監生率依天順六年事例挨次分撥諸司歷事三閱月滿日考勤移文吏部註選仍留諸司歷事九閱月連前一年其諸司寫本監生亦以一年爲滿送部聽選其清黃寫誥及天財等庫書辦等生仍令本監照依見行事例扣筭與歷事監生年月相等分撥

上皆允之夏四月辛亥禮部奏言兩京監生俱每年會官揀選年五十五歲以上者皆屬年老五十

五歲以下殘疾貌陋者回籍爲民又以給事中
丘弘奏言以禮部都察院堂上官會同祭酒每
年考選一次皆爲未便今議宜從先任祭酒陳
敬宗所言令提學於所臨地方無分廩增每年
會同各府州縣正官嚴選有人物鄙陋學問不
成及平日行檢有虧者黜之其考中送監者免
其揀選則諸生得以專志向學進用矣

詔從其議辛酉南京禮工二部以祭酒周洪謨先
議修理饌堂水磨及器皿以待會饌夏六月戊
午南京禮部奏以會饌爲舊制再移文修理器

物不在弭災停止之數秋七月祭酒周洪謨奏
言本監紅板倉二十座係

孝慈高皇后積糧以惠養監生妻室乞爲修理庶以
表著

高皇后良法美意於億萬年也

詔從之自後建倉房易蘆席覆以瓦八月禮部奏
以監生周中等乞明撥歷事查議先後事例不
分先後取撥務要查算年月明白除虛曠外仍
以實坐堂與依親准作坐堂月日通算淺深挨
次撥歷其復班監生查扣地方遠近水程月日

悉作虛曠其見在依親合取復班者俱令給本省文移起送其止給州縣文與託稱買書從學來京窺伺攬先投告入監者俱送問後入監隨仕讀書者非父兄不准查曠監生有欺弊者許受誣之人告究

詔從之冬十一月丁丑以聽選訓導胡昱言將天順八年至成化二年已經行取依親監生復班肄業其成化三年以後放回者暫且停止候年豐京儲有積另行查取庶幾存省京儲以備國用是年令放回監生凡遇迎接

詔勅拜賀

聖節等儀務服本等衣巾隨班行禮不許戴大帽
繫纓帶及輒入公堂囑托或往他處邀求又令
復班監生起送文憑務由本省若路不由省并
南北直隸俱各於本府毋得輒給於州縣其有
隨父兄任所讀書者俱憑本處官司保結非任
所者不准

辛卯成化七年春正月改周洪謨爲北監祭酒洪謨
字堯弼四川長寧人正統乙丑進士及第爲編
修時卽建言復提學憲官以振作人材自是頗

百題三才四
以好名見短於時九年考績進侍講又二年改
侍讀掌南京翰林院以纂修

睿皇帝實錄擢侍讀學士及掌兩監事多所建白在
南承劉俊之後學規縱弛洪謨始振舉舊規士
類肅然憚之後陟禮部左右侍郎尚書竟以言
事被論所著有疑辨錄每與朱熹相矛盾辨春
秋所書正月据戴良以爲建寅寔非建子好異
者皆喜之卒謚文安二月丁未以南京翰林院
學士王偁爲祭酒初吏部以國學之師最難其
其選推舉偁及左庶子黎淳以聞

上以命與夏五月令監生重歷九閱月者減兩月冬
十二月祭酒王與奏請添設本監看守倉廩斗
級十名以法司徒役者充之

上從其言行南京戶部

壬辰成化八年夏五月丙午戶部奏取監生過後湖
查理黃冊惟用八百人

上從其裁省秋八月甲寅依親監生楊英等五十二
人各告患病及母老無人侍養乞照例冠帶閒
住原籍官司各具奏

聞移文本監銷註

成化九年春二月壬戌朔山西道監察御史洪性奏言帶去監生往京畿道照刷南京文卷例該應付廩給脚力往來未免勞費宜與南監選撥監生日饌月糧仍於本監支給照刷畢日照例出身

上從之於是選撥監生田表等一百人遂爲令秋九月令荆襄四衛官軍取其半照舊制漕運本監倉糧仍令御史巡察冬十一月丙申祭酒王與劾奏本監典簿楊傑出身吏員貪污有跡遂以不謹免傑官與又議以本監錢糧爲養賢而設

收支專於典簿不能無弊宜兼委博士助教等
廉謹屬官一員不妨職業公同典簿收支則奸
弊易息而事體歸一矣從之乙卯南京戶部奏
以在京官吏戶口食鹽實徵舊例有歲用糧多
而食糧不敷者則徵米以備供給有歲用糧少
而存積有餘者則納鈔以備支用如有閏月計
口納鈔一十三貫徵收存留起解造冊送部查
考

上從其言移文本監

甲午成化十年春二月甲子令公侯伯并駙馬初襲

授者送監讀書習禮祭酒一依學規教之其不能背書及懶惰不律者奏

聞秋八月辛丑南京守備太監安寧等言據監生宋福等告稱各部寫本監生歷事一年爲滿要將在守備辦事者三年減作二年依例撥歷十閱月庶於事體均平於是行南京吏部咨查本監呈稱查得守備處辦事監生坐堂四年撥出辦事三年歷事一年共八年寫本監生坐堂六年以上撥出寫本一年共七年如此則宜如安寧所言准令辦事二年送回本部照例撥歷十

閏月滿日附選與寫本監生斯一體均平矣
制曰可

乙未成化十一年春正月戊午巡按直隸御史洪性
言奉

勅帶同監生照制文卷將違錯駁出叅照經該官
吏人等南京五府六部等衙門掌中軍都督府
事成國公朱儀等八千九百二十八員跡其情
犯雖有輕重論以法律俱屬有違都察院以聞
上皆宥之不問惟令改正而已夏六月令公侯伯初
襲并駙馬年二十五以下者俱送監讀書秋七

月乙亥過湖查理黃冊當用監生八百名時坐堂者惟二百餘人不足以充數典簿廳查得凡遇一應雜辦差使舉人不與歲貢生混同差撥今舉人在監者人數亦少移文南京戶部回稱舉人與歲貢雖曰異途及其到監均爲監生況查無舉人監生優免之例於是令舉人左慶等往役然猶未敷宜俟各項監生至日如數足之八月甲申祭酒王僎考滿如京師以病奏乞致仕

上不許會病愈遂復任戊子取撥監生胡昂等二十

名同南京戶部委官查盤內府承運等庫物料
九月甲寅

上賜祭酒王僉誥命曰太學賢才所繫祭酒師表攸
存自非經學之優德行之良足爲人之楷範者
曷克稱厥職哉咨爾南京國子監祭酒王僉早
以文學高擢甲科史館經筵累著勞効爰自學
士進陟今官顧其操履之端造就之勤厭于士
論簡在朕心宜錫寵榮以示褒顯茲特進爾階
朝議大夫錫之誥命以爲爾榮嗚呼朕於興學
養賢之志篤矣爾其益謹範模以表勵後進以

稱朕崇嚮斯文之意其敬之哉冬十一月以監生丁憂月日旣爲虛曠告訐紛紜祭酒王與旣視事欲使情法兩盡乃以義起令在監丁憂服滿復班者每坐堂三日加一日謂之加丁以杜告擾且憫其情也後遂爲例

由成化十二年春二月己卯奏准南直隸歲貢生仍送本監夏四月巡按直隸御史吳文元行本監取差撥刷卷監生劉墳等五十名六月辛卯祭酒王與奏准依北監事例減歷該歷事十閱月者減作六閱月寫本一年者減作八閱月於

是南京守備辦事監生潘璣等援例以請吏部以璣等辦事實與寫本相同宜聽其減從之秋七月丙寅北監祭酒周洪謨奏請加孔子封號改大成至聖爲神聖廣運若謂孔子陪臣不當稱帝則先儒羅從彥嘗曰唐旣封先聖爲王襲其舊號可也加之帝號而褒崇之亦可也所封乃當時天王之王旣正南面之位宜服冕十二旒衣十二章十籩十豆各增爲十二六佾之舞增爲八佾之舞且古者鳴球琴瑟堂上之樂笙鏞祝敔堂下之樂而干羽舞于兩階今舞羽居

上而樂器居下非古制也宜令典樂者改正

上命禮官議之於是尚書鄒幹上言正統十二年三月巡按直隸御史李奎奏請加封孔子

英宗皇帝制曰孔子萬世帝王所尊已有大成至聖之號

祖宗以來既仍其舊不必增益今聖神廣運出於伯益贊堯之詞不若大成至聖本於孟子中庸猶可以擬議也洪武中新創南京太學止用神主不設塑像故當時祭酒宋訥奉

勅撰文有像不土繪祀以神主百年夷習乃革之

語今北監所有塑像皆因元舊不忍撤毀耳以此觀之冕旒蓋因塑像之舊亦非

聖朝之制而籩豆佾舞之數則

祖宗斟酌已有定式矧易謚號加器數舉不足爲孔子重輕所貴乎孔子之道者在身體力行乃尊崇之實耳所據加封籩豆佾舞俱當仍舊惟佾舞居下則行太常寺考正之

上是其言九月壬子洪謨復奏言孔子之道莫先乎禮樂今欲體孔子之道亦莫先乎禮樂若不能備其禮樂則無以將其誠敬報本之義旣踈體

道之功安在

上乃降制曰尊崇孔子朝廷盛典籩豆侑舞如洪謨
所奏增之冬十月丁酉本監移文禮部太常寺
各增籩豆侑舞之數按鄒幹所言與今日所定畧同自是丁祭
羽舞始居下焉甲午刷卷監生有家小者照歷
事監生關支月糧

丁酉成化十三年春正月戊戌南京兵部奏稱軍職
官員遞年襲替及每月差撥馬快船隻缺人寫
本欲照例於南監選撥監生一名送部書寫滿
日仍行更替從之二月丁丑釋奠于先師孔子

初用八旬夏五月南京大理寺卿邢簡乞恩以子野亨入監讀書從之秋七月御史戴縉建言災變宜令兩京文武大臣照成化四年事例自陳致仕於是祭酒王僉奏乞放歸田里九月己丑吏部以僉年未六十上聞於是

詔不允其辭八月祭酒王僉令監生陳紀等攢造精微文簿覈實有無祖父及母與嫡繼慈養等毋防其加丁告擾也

成化十四年夏五月祭酒王僉奏言三事其一曰會試副榜不願就職與下第舉人俱照例送

監讀書但中有年淺未該取撥而願依親者宜放回依親其不當放回舉人有南方人告願入南監者准送本監肄業其二曰丁憂復班監生務要辦事半年滿日方許撥歷今後依親復班監生俱照丁憂事例務要坐堂及差撥或內外衙門辦事一年滿日方許循次撥歷其三曰本監每年承領光祿寺官家寄養爲因停止會饌已久膳夫人等自備麩汁飼之往往瘠死變賣產業賠償因而在逃勾攝艱難宜令該寺自行飼養雖經禁止然猶因循止減其半乞加查勘

盡行革免

上皆從之是年令坐監舉人撥歷未及願回依親者
聽提學併分巡官及各該有司正官照例提督
考校

弘治十五年春正月己卯祭酒王與令監生編
輯本監條例分吏戶禮兵刑工爲六類四閱月
乃成編先是正統戊午雖嘗奉

命編猶未成至是與日加檢閱始克就緒

祖宗舊章因是不費與之功也夏六月辛卯戶部奏
准南京官吏該關椒木及戶口食鹽俱折色錢

鈔兼收照原折鈔數每貫折錢二文於是南京
戶部移文本監支放冬十一月癸巳南京刑部
言十三司寫本監生共有九名每遇審因彼此
牽制以致淹禁宜增設五名從之甲午南京守
備處辦事監生章順告言辦事日滿與坐堂該
歷監生岑熙楊堉資次相等乞差能書監生一
名替回照例撥歷從其言行之丁酉

詔監生歷事有不願出仕者授以正七品有司職
名依親坐堂授以正八品職名俱令冠帶閑住
原籍官司以禮相待免其雜泛差徭

成化十六年春正月己亥舉人監生馬鉦等自北監改南放回依親起送復班而咨冊日久未到南京禮部移文本監取具各生保結准令循次撥歷以候咨冊至日若有虛詐卽行叅究自是始有改監暫收之例初永樂中監生曹盈等自南監改北奉有

欽限其後自北監改南者惟據咨冊而已鉦等入監日期稱與先有咨冊者舉人監生郭宗信劉訖相同而實無所據故禮部以此行之其後自北監改入者日以衆多雖有紅單猶私增日期

以圖速撥本監移文往返稽覈殊爲紛擾乃定撥歷之數十人爲率入本監者七人自北改南者三人三七之法自此始甲辰本監以監生家小月糧多冒支者乃奏准禮部行各省凡監生告給家小文引務要審實正妻妾婢之屬明白開寫以憑關糧而奸弊可革於是監生方崐等復監據引收幫夏四月南京吏部尚書崔恭子珂南京禮部尚書倪謙子阜俱自北監改入本監肄業五月戊子筭曠監生張英等查自洪武以來正歷及寫本辦事等雜歷事例立案遵守

冬十月癸丑南京禮部清查違限監生吳龍等有官吏里老官醫人等勘過保結在令復監其有起復而無保結者丁傑等二人有起復無官醫保結者劉臻等一人俱暫收肄業聽候照勘若有虛詐仍發充吏十一月己亥南京太僕寺卿王榮子愈自北監改入本監肄業

辛丑成化十七年春二月祭酒王僊奏請修理國學御史余統亦以爲言

上命先將倒塌尤甚者修造未急者暫停冬十月乙巳南京禮部右侍郎李本奏乞恩以其子文昌

入監讀書

上命准照例

宣成化十八年春二月祭酒王俱以秩再滿陞南

京吏部右侍郎

詳見本傳

三月署監事監丞陳旅復

奏請亟修國學以疏內宇塗擦事屬不謹行南
京刑部提問署典簿事助教丁輓等與馬夏四
月以南京太常寺少卿劉宣爲本寺卿掌本監
祭酒事五月戊寅禮部奏准令在京三品以上
官政績顯著者廕一子入監必先試能通經書
大義方許秋七月令歲貢監生方啓等一百七

十八人回籍依親候行取復監以坐班人衆而廩饌不足故也閏八月戊辰琉球國中山王遣其陪臣子蔡賓等五人入監受學先是四月癸卯福建布政司以遠夷慕義奏聞

上命應付舟車脚力送南京禮部行本監查照洪武末樂宣德年間事例修理號舍居之光哲堂給與合用什物及冬夏衣服雖從人亦如例與之時外夷官生不至已久所司詫爲異事工部爲製用度紬襖牀卓柴薪之類皆惜無所稽每移文本監而後行焉冬十一月乙未朔太常寺卿

掌監事劉宣以琉球官生蔡賓等束修有白金一斤辭不受後四年賓等復申請前事以聞上命宣受之

癸卯成化十九年夏五月辛丑大名大長公主庶曾孫李禎奏乞恩入監讀書許之秋九月清理監生先是掌監事劉宣以繫籍太學者凡一千七百一十六人而坐班者不過五百八十八人奏請行文原籍清理凡有遇會試之年徑赴禮部已中進士及就副榜者有遇例徑赴吏部告授雜職及教職者有病故及緣事者有司止催見

在復監宜令不拘存亡俱造冊開報待朝覲之時齎赴禮部發監查照以後爲例

上從其言禮部遂行之

甲辰成化二十年春三月詔生員納粟備邊者許入監自本年十月起至二十二年五月止俱入班兩閱月放回依親有告願自備柴米寄監讀書者聽尋令監生年二十四歲以下情願坐監者令其自備柴米寄監讀書扣年二十五歲以上方准食糧收撥秋七月癸卯刑部致仕員外郎戴昇奏言父太常少卿慶祖正統己巳扈從北

征死難贈本寺卿錄臣叙用然一時同死者工部侍郎王永和長子汝賢已廕爲評事又令次子汝敬入監讀書翰林學士張益長子翊已廕爲序班又令次子翔入監讀書通政龔全安之子廷輝已廕爲照磨又令其孫詔入監讀書惟臣父所廕臣一人而已今考滿至部以年例致仕更無以次子孫在官少效勤勞者乞照例令臣子愈送南監讀書以圖報稱

上許之八月丁卯南京工部右侍郎劉俊等以祭酒王與監丞陳旅前後奏請修理國學會同內外

等守備太監安寧等往監審度房屋坊垣果已
損壞相應修理已計物料候明春和暖興工
上從之

己成化二十一年春三月壬午禮部言南京吏部
筆官會題欲將納米銀監生令其自備柴米坐
堂肄業查得放回依親監生自備柴米寄監讀
書者出其中情非監規事例也宜將各生照歲
貢地方則例分送南北二監中有因親仕宦兩
京願告依親入監者不拘南北聽從其便俱限
兩閱月照例放回依親有願告自備柴米寄監

讀書者仍照復監事例關支月糧其年十七以下者備行原籍本學肄業嚴加作養考校務令成才仍以入監日爲始扣滿十年方許起送復監其願坐監者亦滿十年方作復監之數其餘年長監生俱令依親候行取明文至日復監循次撥歷出身

制曰可甲申掌監事南京太常寺卿劉宣奏言國學損壞已甚猶未興工

上命南京工部舉行至秋九月始有移文焉于時中官用事釋老之宮窮極土木而國學乃緩如此

夏閏四月辛丑納粟監生沈曄等二十九人自
北監奏准收入本監肄業冬十月丁酉吏禮二
部奉

詔會議生員由科貢入監乃

祖宗舊制納粟准充監生則一時之權宜也若循次
撥歷滿日入選則納粟者比之科貢數多誠有
不均矣宜分爲兩行斟量相兼撥歷俟納粟監
生撥歷已盡則科貢之士可以復舊循次出身
制曰可

兩成化二十二年春正月初分監生爲兩序循次

撥歷各置精微文簿夏五月令納米銀監生到
監兩月放回原籍收充增廣生員年二十以下
者八年二十以上者五年滿日行取入監坐班
序撥秋七月改派膳夫一百名於蘇松常徽寧
國五府以糧僉充用巡撫右副都御史王克復
言也九月庚申吏禮二部言查勘得先年奏准
納粟與科貢監生相兼撥歷已有定例然彼時
兩途相等今則納粟約有三分科貢惟有一分
撥歷之時宜從兩監查勘多寡增減得宜除虛
曠外凡復班六閱月以上資次當撥歷者分兩

行因其復班歲月深淺以爲先後之序臨撥復扣筭兩途人數多寡以三七分爲率或用四六分酌量均平相兼撥歷

制曰可冬十一月丁卯

賜劉宣誥曰國學乃育材之地太常寔禮樂之司兼茲職任欲稱惟難自非經學宏深德行純正之士曷以預是選哉咨爾南京國子監掌監事南京太常寺卿劉宣發身科第歷任翰林修史秉筆削之功校文收藻鑑之譽陳謨講惺啓沃良多兼職宮僚慎勤益著荐陟秩宗之正載綰

國監之章惟夙夜恒篤乎寅清宜賢才均蒙其
造就顧斯勞勩寵渥宜加特進階通議大夫錫
之誥命以爲爾榮夫致治本於得賢而得賢由
於興學肆朕欲成人有德小子有造固不忘譽
髦斯士之志爾固念師道立則善人多之意期
遠追言動是效之風爾惟懋哉十二月太常寺
卿掌監事劉宣陞吏部右侍郎宣字紹和江西
安福人自主員補盧龍衛軍景泰庚午順天府
鄉舉第一辛未進士入翰林積至今官其爲祭
酒修立教條卹病賻死士夫稱之後終禮部尚

書謚文懿

丁成化二十三年春正月以南京翰林院侍讀學士徐瓊爲南京太常寺卿掌本監祭酒事二月癸未北監奏言每年監差撥內外衙門辦事歷事該七百六十餘名每清黃刷卷年分又各加一百名常須一千八百名以上乃充撥用見今坐班者七百餘人而已凡放回依親者不分科貢納粟通宜行取復監

上從之因行本監以南京差撥視北尤多查理黃冊已須八百名其餘亦至五六百名合令務足二

千之數移文南京禮部催促復班肄業夏四月
令北方科貢納粟監生告入南監者聽秋七月
吏部右侍郎劉宣子監生秉常奏改北監依親
肄業許之

詔行人黃乾亨死王事取其子如金入監讀書八
月

敬皇帝卽位掌監事太常寺卿徐瓊受

誥命文與劉宣同時館閣載筆非人故也冬十月
甲午禮部右侍郎掌北監祭酒事丘濬奏言北
監南人數少誠爲偏重有失夾持進學之意欲

將本年會試下第舉人到部告入南監及新中
舉人放回依親者照依奏准北監舉人入南監
事例盡數送入本監讀書太子少保禮部尚書
周洪謨等以聞

上從之濬又奏言區處納粟監生事宜亦見施行見

奏十一月朔備祭器先是廟廡祭祀磁器年久
多損委檢討管助教事龔福檢閱具數委監生
胡冕彭榮劉晏往江西浮梁市之出價銀一百
七十餘兩以報本修祀一無所求者監生懷沐
許蒙周驤金鳳曹文顯方岳潘昂王禮沈愚沈

曄韓綸蘇謙葛濬也

孝宗敬皇帝成化弘治元年春正月甲寅朔鑄文廟香鼎香盤先是文廟有鐵香爐刻有文曰提點湯玄澤鑄造諸生以其瀆禮故更鑄之戊戌考授敎職監生丘光大奏言科貢納米兩項名數多寡照依奏准事例三七四六相兼撥歷南京國子監與北監事體既同宜以科貢七分納米三分俟科貢人少則以四六分撥仍遵

純皇帝明旨臨期酌量務在均平從之閏正月丁卯

南京工部奏言

詔書修建一應不急之務悉皆停止國學育賢乃
王化首務寔急務也修理工程已完三分之二
若遽停止前功盡棄

上命照舊修理庚午纂修

純皇帝實錄本監事實令學正曾瑤查考編類造冊

國子監事實七條一勅旨凡奉勅諭警戒
及聖旨戒約榜文等項一一開報一幸學
車駕幸學謁先聖命學官進講從官賜坐賜
茶禮儀及宴師生明著日月報來一生徒遞
年監生數目及有特旨拔擢者具姓名月日
開報其大侯駙馬伯儀賓遣入讀書習禮及官
員子孫并四夷遣入監者有例亦報一學規
凡新舊學規及肄業考試常程一一開報一
廩膳師生廩膳條例一一開報一歷事監生凡監
生歷事新舊條例一一開報一本衙門各年

行過事件有干條纂修可爲三月甲戌
勸懲者皆須逐一點檢具報

勅諭兩京國子監訓考夏五月禮部奏言科貢納

米監生放回依親自正統以來已有定例今有
等願留坐班及自備柴米者貪圖越次出身宜
照先年戶部奏准事例令各坐班兩月放回直
待行取方准坐監關支月糧

制曰可秋七月丁卯吏科給事中林廷玉言事謂
豫處置以成人材納粟監生立爲上中下三等
臨選吏部出題嚴加考試以文理通暢者爲上
文理稍通寫字端楷非請客者爲中不諳文理

寫字祖拙請客者爲下上中二等量其高下與
科貢一體選用下等者填註衙門職名令其冠
帶閑住行移兩京國子監及天下學校省諭各
生使知及時進學毋致後悔

上是其言吏部遂著爲令冬十月壬辰釐正文廟從
祀不果行先是禮科右給事中張九功奏言孔
子之道大同天地從祀諸賢豈容或苟如荀况
馬融王弼楊雄皆在所當黜今之儒臣禮部侍
郎兼翰林學士薛瑄在所當入

上命禮部會議於是尚書周經等僉言楊雄已黜於

洪武時而薛瑄嘗與元儒劉因竝欲從祀以大
學士楊士奇謂其無所著述而止自餘皆有羽
翼聖經之功宜仍舊從祀惟詹事府少詹事兼
侍講學士程敏政奏言考正祀典欲罷祀者戴
聖劉向賈逵馬融何休王肅王弼杜預八人名
祀於其鄉者鄭衆盧植鄭玄服虔范甯五人苟
楊實相伯仲言者併欲黜况宜也申棖申黨其
實一人祀宜存棖公伯察秦丹顏何遜瑗林放
宗諸不在七十弟子之數宜祀瑗於衛祀放於
魯察及丹何則罷之禮記傳於后蒼與王通胡

瑗皆宜從祀且子雖齊聖不先父食類曾與子
思配於廟而父坐其庭庶可乎於廟學別立一
祠中祀啓聖王以杞國公類無繇萊蕪侯曾點
泗水侯孔鯉邾國公孟孫氏配享末年伯程珦
獻靖公朱松從祀部議亦不從敏政之議惟仍
其舊

上可其奏乃移文本監知之

按后蒼言行無可考者王通僭經宋儒所不取

侍郎何孟春謂七十弟子門人有公孫尼子者作樂記繡衣矣吐辭爲經宜列從祀敏政乃不之及何邪近年敏政之議始見施行云

配弘治二年春正月甲戌訓導莫旦進

大明一統賦

上嘉之擢爲本監學正三月南京禮部尚書黎淳奏
言洪武永樂年間會試取士不拘南北自

宣宗章皇帝命內閣大臣會議始分北直隸山東河
南山西陝西爲北數南直隸蘇松等府浙江江
西湖廣福建廣東爲南數四川廣西雲南貴州
并南直隸鳳廬等府滁和等州爲中數取士以
百名爲率南數五十名北數三十五名中數一
十名永爲定制近因成化丁未會試四川左布
政使潘禎建言中數人少將南北二數各退二

名添與中數

祖宗成法妄加損益宜復宣德丁未所定數目禮部
議謂允當

上從之移文本監夏五月命戶部左侍郎李嗣子辰
入監讀書六月南京吏部尚書王僎奏言先年
兵部尚書余子俊廕其姪寰吏部左侍郎崔恭
廕其姪柯都察院左副都御史張瓚廕其姪宸
右副都御史孫仁廕其姪玠今臣例當廕子然
長子沂叨中進士次子洛年幼學淺惟姪廩膳
生澄粗已成材乞送監讀書

上從之秋九月戊午少傅兼太子太師吏部尚書謹
身殿大學士劉吉等言舉人監生會試至三次
不中者再不許入試

上以爲然遂准行之已而聽選監生林瀾等連名以
行移未徧天下哀請罷之

上復准令明年照舊入試輿情皆謂內閣待士失之
隘云冬十一月甲戌冬至令節南京禮部預移
文本監差委屬官一員齎捧

表箋典簿廳案查以成化中嘗差學錄明輔常纓
後以堂官專司教事不預差遣而止掌監事徐

瓊不從十二月以太常寺卿掌監事徐瓊爲禮部右侍郎瓊江西金谿人天順丁丑進士及第仕終尚書然在監碌碌無所聞論者以巧宦少之

庚戌弘治三年春正月以翰林院侍講謝鐸爲祭酒

侍講楊守拙送謝祭酒先生之南京詩序國朝兩京監學蓋倣周制文王都豐既作辟廱武王遷鎬又作辟廱見於詩大雅者然也我太祖創業于吳始建國于監于維鳴山之陽太宗駐蹕于燕復設監于安定門之右是卽文武豐鎬並建辟廱之制監有諸生數千人經師數十人司業之上祭酒加焉又卽周人樂正司業父師司成之職也祖宗建學立師憲章文武列聖不愆不忘率由舊章百餘年來教化興行俊賢登用海寓又寧斯其效也然其間師

儒承化敷教之功亦豈少哉在洪武間則有若
宋公訥在末樂間則有若胡公巖在正統間則
有若李公時勉陳公敬宗皆以祭酒顯名者至
今學者仰之若山斗況於親炙之者乎邇者南
京國子祭酒缺上命翰林侍講天台謝先生
鳴治陞位厥任命下之日朝紳相語以得人
爲慶蓋先生爲人和而介清而不隘官詞林十
數年以文名四方而清介之德人尤重之尋以
家艱歸十年不起又以恬退之節聞天下朝
廷以史事召之不得已而起庸詎知有今日之
舉哉世方馳騫於聲利上之簡命得一清介
恬退之賢而用之則仕者知所激勵下之表率
得一清介恬退之賢以道之則學者有所勸懲
此轉移世道之一機也孟子曰人有不爲也而
後可以有爲然則先生欲爲宋胡李陳諸公似
無難者况陳公爲鄉先達爲南京祭酒屬耳其
則不遠者乎然予非徒以諸公望先生也進而
上之若宋之楊中立唐之韓退之齊之荀卿周
之彫伯皆以祭酒名世者斯亦人耳亦在先生
爲之而已矣他日考論我朝監學之制追蹤

於古材賢治化之盛比隆於古師儒得人之功
匹休乎古人者必有及乎先生是則予之所欣
願也然予竊有感焉先生與予兄弟同官詞林
鄉曲之好麗澤之益最深且久今予兄文懿公
既沒哀痛方殷而又重與先生別何能爲懷且
予之喪兄寔喪師資考德問業無所於從日就
荒落所賴振起以圖後功者不能無仰乎先生
今又遠去之南則予懷之戚戚其能已乎欣戚
之餘輒爲詩四章以紀事道情且又自爲之序
併以爲先生贈夫爲祭酒得人而喜天下之公
也爲麗澤失人而戚一人之私也不以一人之
私易天下之公詩之志喜者三而志戚者一先
生覽之其必能亮予之衷副予之望且有以處
我乎哉 編京建學四方同豐水猶存舊辟塵
聖代遠遵周典禮賢關新得漢儒宗三千負笈
來於佩儉萬國橋聽鼓鐘從此英才歸樂育
明堂梁楠待登庸軺傳東來起謝安重携彤管
入金鑾鹽梅未試和羹手俎豆先歸祭酒官
虎踞城深槐樹市雞鳴山繞杏花壇臯比講罷
多清暇好著經書百代看南都歷歷大司成吾

郡陳蕃負重名兩浙久無人繼武百年再見子
爭衡天台路接慈溪近壁澤源通泗水清師道
直須宗魯叟肯饒先達獨馳聲同署同鄉賦又
隣與吾兄弟最相親十年契濶重歡洽此日分
離百感新姜被悲連風雨夜誰憐思割雪霜晨
翎原寥落情無賴況是鶯遷別故人漢儒宗謂
謝該爲漢名儒陳蕃指慈谿陳敬宗謝朓則謝
眺江淹事也後鐸見守陞所寄南廡志贈行詩
在焉時守陞以侍郎兼攝南廡事因次韻四首
十年騎馬候長安幾共銷銷聽入鑾萍水不知
今異跡夢魂猶憶是同官全蘭未改初心約雞
犬翻嫌軟血壇珍重贈行詩句好南廡志在有
人看風情長復念爲隣笑語何期此再親清世
浮名真似夢白頭交態幾如新勿勿急急景空過
隙落跡星已向晨看取汗青千古在至今不
朽是何人文章科第豈天成獨向中朝享盛
名位攝司成眞樂正望參家宰老銓衡人材大
抵隨時重門地從來似水清池草竹林天下秀
更誰能比此家聲聖祖心眞大造同卽從開
國講臨離斯文謾說天將喪吾道今爲世所宗

賸有生成隨化雨不須善問撞洪鐘三月庚申
作人功在知無極況復先生此奮庸南京吏部尚書王俱奏言兩京戶部等衙門俱
有寫本監生惟本部及南京禮部未嘗添設且
各衙門寫本俱行本部取撥戶工二部乃徑自
行取及至滿日仍送附選年月深淺無從查算
欲將吏禮二部各添設二名兵部再添設一名
戶工二部俱從本部取撥

上從之秋八月己丑刑科給事中胡金建言儲養將
材嚴著程式文事武藝相半講習行移兩京五
府各將侯伯都督有新襲不曾任事者有子孫

應該襲蔭者通行送營以習武藝送監以習文
事在營月一試驗馬步中箭若干在監則聽祭
酒司業月一試驗策畧併背誦武經等書各按
季類報仍行在外鎮巡提學官各查武職應襲
子孫十六以上三十以下試驗亦如之兵部以
聞

制曰可冬十二月戊戌禮科給事中王綸請罷舉
人監生三試不中不許會試之例從之

辛弘治四年春正月庚子祭酒謝鐸奏言修明教
化六事一曰擇師儒以重教化之職二曰慎科

貢以清教化之源三曰正祀典以端教化之本
四曰廣載籍以求教化之基五曰復會饌以嚴
教化之地六曰均撥歷以拯教化之弊自今而
觀惟撥歷最爲緊要而會饌次之其他不以爲
迂泛不切則以爲窒礙難行然竊思之不擇師
儒則所教或非其道不慎科貢則所養或非其
賢不正祀典則駿奔仰瞻之際無以示趨向不
廣載籍則明體適用之學無以資見聞臣恐會
饌撥歷一切皆爲虛文故事以如是坐食待次
之人而欲備他日天下國家之用臣愚誠未見

其可也擇師儒必先將臣罷黜然後力求道德之士若唐之韓愈宋之楊時庶幾教化有賴至於提學等官權足以黜陟職之所關視國學則爲最切故必得廉靜恬退之士而有嚴重剛方之操庶足以稱其任不然或矯激以賣公道或假托以蓋私恩科貢由之而弊人材以之而衰臣豈敢推過於人哉其實天下之士十數年養成於彼而欲一旦責成於此雖有智者亦無如之何伏願

聖明精擇其人而無如用臣之誤則庶幾於教化之

職無負矣夫國學爲養士之地而科貢實取士之階不可不慎也蓋科舉必本於讀書今而不讀京華日抄則讀主意不讀源流至論則讀提綱甚者不知經史爲何物歲貢必先於食廩今不以貨賄廩則以權勢廩不以優老廩則以恤貧廩甚者不知舉業爲何物宜勅提學等官凡日抄等書在書坊者焚之在民間者禁之未食廩者嚴加考覈而不容其倖進已食廩者痛加裁革而不恤其私怨如此庶幾國學之所養者皆賢矣孔廟從祀之賢實萬世瞻仰所繫有若

龜山先生楊時息邪放淫以承孟氏不愧南軒
所稱繼往開來吾道南矣實行晦翁之派雖其
晚節一出不克盡從其言而新經之闢誠足以
衛吾道又若臨川郡公吳澄生長於淳祐貢舉
於咸淳受宋之恩已如此其久爲國子司業爲
翰林學士歷元之官乃如彼其榮迹其所爲曾
不及洛邑之頑民何敢望首陽之高士况二人
皆太學之師也乞升時以上祔宋諸賢之位斥
澄以下從莽大夫之列則於世道教化不爲無
少補矣本監所有書板雖舊多藏貯而散在天

下者未免有遺雖旋加修補而切於日用者猶或未備乞勅各布政司將所有如程朱大全集與宋史等書盡行起送到監而改東西書庫屋爲樓上以爲庋置之所下以爲印造之局則不致污壞散漫而教化之助亦未有賴矣監生之會饌猶百工之居肆不惟朝斯夕斯得以專精其術業實亦相觀相善有以收斂其放心自景泰初以柴薪缺少暫且停免逮成化中致饌堂損壞遂成廢弛今饌堂廚竈修造將完所缺者器皿米肉椒油支給如故所少者柴薪乞將饌

堂前廊房照舊蓋造以便往來而器皿柴薪或
取之抽分或資之買辦務使經久可行則養士
不爲虛文而教化之地亦益見其嚴密矣往歲
會議之時納粟監生約有三分科貢監生止有
一分故分爲兩途相兼撥歷或三七分或四六
分是以名數之多少爲撥歷之多少也然

先帝聖裁猶命該監臨期酌量務使均平今見在監
生納粟止及一分科貢已有二分若泥於舊制
納粟仍爲六七科貢止於三四則不均之嘆實
所不免殆恐非

先帝臨期酌量均平之深意也臣愚欲乞轉科

六七更納粟爲三四庶幾易窮則變變則通之
義雖於教化未能少補而流弊亦不至於甚極
也

上准議行之於是撥歷科貢得七或六人皆感悅然
納粟諸生或怨焉然亦終服鐸之公夏四月祭
酒謝鐸陳情致仕許之六月以左春坊左庶子
李傑爲祭酒以纂修勞支正四品俸

弘治五年春正月丙申南京戶部以江西布政
司有故違禁例以開弊端者并應天等府直隸

隆慶等州見收在庫黃冊委本部署員外郎主
事余完等取撥監生一百名往後湖清查造冊
奏繳饌米夫役皆於本監供應前此所未有也
癸丑弘治六年春正月甲申命南京大理寺卿章格
子淦入監讀書二月甲辰命常寧大長公主孫
沐琚入監讀書夏四月祭酒李傑陞禮部右侍
郎傑字世賢直隸常熟人成化丙戌進士入翰
林累遷至今官後終尚書五月丙戌南京戶部
奏言弘治五年天下攢造戶役黃冊今既造完
例當送部轉送後湖收架照依事例差委南京

管厠給事中一員御史二員本部員外郎主事
四員取撥南京國子監監生八百名給與本監
官糧并魚肉鹽茶等件取撥膳夫供給應用若
庫房什物缺少行移南京工部支料撥匠修造
但監生數少上年已是不充宜取三百五十名
過湖同心協謀關防嚴密分查審察毋致偏枉
變亂版籍逐一駁查追究以革姦弊戶部以聞
上命行監撥監生三百五十名合用供給夫役照例
行之六月以福建按察司提督學校副使羅璟
爲祭酒秋九月戊申都察院右副都御史張敷

華奏准凡帶俸侯伯不拘員數編撥五軍十二營如進士觀政之例聽提督內外大臣置立文簿二扇稽考勤惰以爲用舍其坐營侯伯尤要延請師儒講習兵法公侯駙馬伯子孫年十五以上三十以下者送監照依監生讀書作課講習禮儀每歲間月赴監比較文事一次間月又赴教場操練武藝一次其侯伯駙馬亦令將兵家諸書及五倫等書每季送祭酒司業日相兼授與二本俱各定起止令在家誦讀免其作課季終拘其赴監驗試如果讀熟而大義或未通

曉卽與講解又復授書還家誦讀季終拘驗如初必至三十歲方免拘束雖公爵已襲在閑官亦依此例時邊圉多棘

上方注意將材故也辛亥監生宋昇狂悖奪他人懸牌不服朴責以首撞柱大詬而出送南京禮部行法司奏請治罪准禮部咨查得洪武二十六年間過監生林春等犯該杖罪照例免杖發歷事刑部及充吏做工等項事例不一會官議擬奏准監生有犯除公罪依律紀錄外有犯笞者笞罪罰贖仍歷一年考勤謹照歷事監生出身

如是平常仍令再歷一年覆考杖罪的決充吏
照吏員資格出身及查得永樂二年九月內生
員林緝爲事照依永樂元年例送充吏今宋昇
兇潑不堪教養有累監規刑部問擬違

制減等杖九十罪名正與充吏事例相同欲將昇
送吏部照例施行

上是其議冬十月壬戌朔申明省祭等違限監生事
例照洪武舊制兩廣違限一年之上浙江江西
違限五月直隸違限三月之上者發充吏限外
不及一月與患保結者送監讀書十二月

乙丑祭酒羅璟奏言坐班人少差用不敷自今後科貢入監者俱暫留坐班以備差用俟後來數多仍照例放回仍催取在前放回監生不分年月遠近俱限自文書出部日爲始除水程外違限三月送法司問罪若所在官司不行催取起送行巡按御史究治

甲寅弘治七年春正月辛丑本監以坐班人少行取原坐北監南人納粟民生楊懷等改送本監補班辛亥命含山大長公主曾孫尹衡入監讀書二月丙戌北監舉人監生儲珊等奏改復本監

先是朱輔等二十人郭蒙等三十一人黎紳等
十二人各行具奏禮部以聞

上皆從之先是禮部左侍郎掌北監事丘濬奏留下
第舉人珊等自陳不便故從其請夏四月己未
朔起取弘治五年以後依親科貢監生復班其
丁憂者許預申聞甲申命都察院右副都御史
閔珪孫宜勤入監讀書六月癸酉行取麻城縣
納粟民生周元壽等復監肄業初令援例納米
銀者入監兩月放回依親仍令本府州縣儒學
收充生員作養五年候行取復監聽撥叙用至

是循次畢至秋七月遣助教張昕齋進慶賀正旦

表箋九月辛亥廕林希賢入監讀書初成化末給事中林榮行人黃乾亨使滿刺加國沒于水禮部以其死王事聞

睿皇帝命各廕一子至是希賢始至冬十月癸未都察院右副都御史徐恪子璟乞恩改入本監肄業十一月甲午命工部尚書劉璋姪獻入監讀書庚子南京工部致仕尚書胡拱辰乞恩以子孟陽入監寄名仍許侍養待身終之日復監肄

業從之

弘治八年春正月北監舉人王冕姚光啓王天民江溥告改入本監禮部從之三月甲申朔命工部右侍郎樊瑩子堆入監讀書夏六月丙辰祭酒羅璟奏言本監實在監生二千六十八名坐班者不過四百九十六名欲照前任太常卿掌監事劉宣清理事例每遇朝覲將三年內舉人及官民生入監者備造文冊分豁舊管收除實在送部發監查照則數清而弊革矣

上從之戊午依親監生趙潤被火燒燬文引禮部查

明令復監肄業秋七月乙酉歲貢監生韋蓋自
陳母老家貧不願仕進給與散官冠帶閑住八
月封宋儒楊時爲將樂伯從祀孔子廟庭先是
少傅兼太子太傅吏部尚書謹身殿大學士徐
溥爲崇祀典以重道學定議謂時雖由蔡京薦
起然入朝首請黜王安石配享廢其新經又乞
罷綱運以收人心斥和議以張國勢竄權臣以
正邦憲培主德以崇治本竝議讜言雖不盡用
然使天下之人知邪說當息諛行當詎淫詞當
放則衛道之功不可掩也或疑其出處之際而

少其著述之功則亦有可言者朱子謂時之出
惟胡安國之言最公曰當時若能聽用決救得
一半又曰蔡氏焉能挽之然則以出處見疑者
未考之過也時值洛學黨禁之餘指示學者以
大本所在體驗之功轉相授受朱子得聞其指
訣則見于何鎬之書朱子於理一分殊之論稱
其年高德邵而所見益精則見于西銘之跋然
則以著述見少者亦未考之過也又按元史至
正二十一年因杭州路照磨何瑜建言已將時
與李侗胡安國蔡沉真德秀俱加封爵列從祀

以世變不及徧行天下此殆禮所謂有其舉之

莫敢廢者躋于從祀寔合公言

上從之

祭酒羅環祭龜山先生文於惟先生伊洛正學道德醇儒靖康小試出其緒餘斥安石之

僭

辟闢邪說之支離據經論事不亟不徐狂瀾

底

柱正道旌麾使謹言而盡聽必有補於當時

五

經義辨學者端趨南庭從祀物議久虛惟

聖

明之重道采定論以升躋爵封大邑斯文增

輝

木主遵制神明來依上溫國而下文定名

德

竝而郊豆齊敬蠲吉日具此牲儀薦誠奠位

享

祀九月甲寅歲貢監生黃經應天府鄉試中

無

期

式告超撥以便會試從之冬十一月壬午金山

衛學民生諸弘道援例納粟自北監改入本監

禮部以有司勘報既明又經提學御史批發原

學壓滿五年雖有過名曾經赦宥移文行監收
管肄業十二月北監官生秦養浩奏改入本監
從之是年奏准歷事監生三閱月考勤後仍歷
一年其餘寫本一年清黃寫誥清軍清匠三年
及出巡等項俱照舊例

丙辰弘治九年春正月祭酒羅璟致仕字明仲江西
泰和人天順癸未進士及第除編修成化丁亥
纂修

英宗實錄成陞修撰甲午纂修續資治通鑑綱目陞
司經局洗馬丁酉坐事調南京禮部主客司員

外郎弘治戊申陞福建按察司副使提督學校
在監甫及滿考常臥疾至是罷二月以右春坊
右諭德管國子監司業事劉震爲祭酒冬十月
戊寅命南京光祿寺卿張達子鑛入監讀書

條例
獨闕

丁巳弘治十年春正月己酉南京戶部尚書秦民悅
子甸奏乞隨任侍養自北監改入本監從之二
月都察院右都御史黃紱子桓乞恩補廕從之
先是南京刑部尚書周瑄兵部尚書原傑俱有
子入監天歿以其孫周伊原應韶補之桓兄杞

在歷未及選用而死比二人例遂得入監夏四月甲申監生李嵩被水漂失文引南京禮部行本監勘實復班乙酉直隸民生孫宸郭墉赴山西布政司納粟納銀詐冒違例入監已經撥歷巡按御史司馬璽查出治罪奏充增廣生員五年已滿至是復監肄業庚寅助教費廣自陳致仕許之南京吏部令其以禮自處毋得干預有司公事仍免雜泛差徭五月壬寅朔命南京禮部右侍郎董越予天穀入監讀書庚戌考察南京庶官翰林院檢討仍管助教事俞智等七員

皆罷六月甲戌廕陳端甫入監讀書禮部以其
曾祖兵部尚書洽求樂中死于交趾比諸工部
右侍郎孔鏞子彥慶右副都御史李昂子世蕃
右都御史羅通曾孫珏事例皆合遂行之丁丑
禮科給事中葉紳奏言資廕之恩不宜太濫今
闕茸無能政績無聞者三年考滿例得資廕誠
恐太學賢關半爲膏粱所當裁懲者也禮部會
議遂定廕叙之法一曰二品大臣合照例准一
子但入監之子未霑一命而死則恩典已虛理
宜補廕二曰廕子入監之典三品以上旣同則

補監之恩不宜獨異合照二品事例三曰凡無子者許立姪承嗣照例入監四曰三品以上官員應得恩典而病故未久合照例許其子孫陳乞其餘一應年遠者俱合禁絕五曰春宮侍從官員講讀年久輔導有功者死後子孫乞恩入監取自

上裁其餘經筵講官子孫不許濫比六曰林榮黃乾亨林霄雖非三品但奉

命出使海外死於波濤沒於蠻瘴誠可矜憫宜加恩恤今後凡非奉使外國遭罹死禍事狀明白

者子孫不許妄援前例七曰雜流出身不係文職正途三品以上官員不許賡緣乞廕

上是其言戊戌監生劉震更名宸以避諱南京禮部從之秋七月甲辰遣學正孫謙齎進慶賀長至表箋冬十二月己巳北監官生馬效才以父陣亡恩廕告改本監肄業以便祭葬禮部從之是年令監生依親水程俱不筭實坐止循食糧月日淺深撥歷其舉人會試水程仍舊

戊弘治十一年春正月戊申河南按察司副使車璽奏言祭酒謝鐸嘗奏革去京華日抄等書誠

有補於讀書窮理然令行未久而風弊滋甚日
抄之書未去又益之以定規模範拔萃文髓文
機文衡主意之書未革又益之以青錢錦囊存
錄活套選玉貫義紛紜雜出由禁之未盡得其
要也乞

勅福建提督學校官親詣書坊搜出書板盡燒之
作數繳部仍行兩京國子監及天下提學分巡
分守等官嚴加禁約遇有販賣此書并歇家各
治以罪若官不行禁約坐以不奉

詔令之罪禮部以聞

上從之本監遂通行南京五城兵馬指揮司庚申禮部奏准開科事事例移文本監令舉人所作文字惟純雅通暢毋得浮華險怪艱澁不許引用謬誤雜書其陳時務須要斟酌得宜便於實用不許泛爲夸大及偏執私見有乖醇厚之風小錄文字務要文理純正者錄出不許代作及將原文改刻三月丁未監生劉瑤原籍江西吉水人從其叔達往廣西田州府爲商遂冒籍爲府學生應貢至是吉安府申結勘改正本監從之夏四月廕左都御史謝昶子元刑部右侍郎屠

勲子應填入監六月甲申掌饌林嵩九年考滿
至吏部陳告致仕許之癸巳就教職監生劉汝
貴等十三人考試不中告願冠帶以榮終身吏
部從之移文本監注銷其劉昂等三十八人皆
復監肄業秋九月癸卯歲貢監生楊清告續聘
畢姻勘結旣明許之丁未鄉試中式歲貢監生
蕭承恭等援黃經事例告超撥以便會試南京
禮部行本監查處冬十月舉人監生朱堂以犯
伯祖諱丙辰會試往禮部更名臣而堂班精微
簿猶名堂至是始復監具呈改正閏十一月乙

酉南京科道因

清寧宮災一疏請黜奸貪以弭災異交論祭酒劉震物議頗沸欲罷之

上不聽十二月南京兵部清查軍士取撥監生一十五名查對書寫完日送回肄業

紀弘治十二年春三月甲申祭酒劉震受

誥命曰國家肇建兩京竝設太學生徒教育兼南北之英才館舍列居合古今之制度然非師道之能立曷致士行之有成既副簡求可無褒勸爾南京國子監祭酒劉震賢科高第翰苑清流

昔焉佐教於成均已加宮諭今則分司於留務
特置南廡師席旣尊官資益稱抗顏自重弟子
各達其材直道不疑士夫終信其行況乎秉公
正以律已初不尚乎朴刑務勤勵而率人實克
傳乎經術屬當布德之日正及懋官之時茲特
進爾階朝議大夫錫之誥命嗚呼太學賢士所
關嘗聞其語司成諸生之表每難其人惟不替
乎初心亦尚需乎後命欽哉謂士夫終信其行
以被論故也二月丙申命都察院右副都御史
沈暉子說入監讀書戊戌南京衣服酒會侈靡

衣用黃紫錦繡食湯有至二百道者

詔禁之禮官行監知會丁未歲貢監生湯傑喪妻
告送幼子還鄉南京禮部行本監勘實令給引
回籍三月癸未南京九卿因災異陳言二十八
事其一曰寬免違限查得見行事例舉人告入
監并監生願就教職考不中復監者俱除水程
四十五日外仍除一月若患病有堪信文憑仍
除三月過期者送問夫謂之舉人入監者蓋指
新中未入監者而言若舊中已經坐監者不在
其數謂之監生復監者蓋指舊貢已入監者而

言若新貢未曾入監者不在其數今告入監舉人不分舊中已曾坐監及願就教職考不中復監監生不分新貢未曾入監但有過期一槩送問似與前例不合及查得除授官員起任過違憑限半年之上方送問罪其舉人監生止許四月未免過嚴況各生違限到監坐班月日虛曠本監自與查算不得出身比赴任官員不同而各生多遠方貧士盤纏有限一經送問贖罪價銀無從措辦尤爲窘迫今後新舊舉人并歲貢監生不分入監復監者過違限期但有患病堪

信文憑俱免送問仍行該監嚴查虛曠月日務要應該方准撥歷出身如無堪信文憑者止照官員赴任過限半年之上事例方與問罪如此則法令適中賢才得所矣禮部議以爲新舊舉人并歲貢等監生該送南監及復監者俱南方之人先從北京順天府給引定限前去入監因見家鄉路近或是畏避坐監俱各私回原籍任其遲延畧無限制爲舉人者直待下科會試將近乃入監掛名隨卽告出會試爲歲貢者恣意在家遊蕩廢業因循衰老孤負作養之恩遂致

國家虛設條教莫施以故南京國子監先年奏
定前例嚴立限期以懲其弊今若改從前議寬
免違限誠恐舉人監生仍前回家久住買求規
合患病文書以爲解釋徒增詐僞之風重隳教
養之政但近年南監事例新科舉人及新年歲
貢入監者俱不放依親就留長坐其名人到京
日久或往返艱難盤纏空乏因便取討者或妻
孥在家無人送因歸搬取者亦有家邦切近
父母在堂順道歸省者此皆人情之切至理旣
難阻法宜少寬合無新舊舉人并歲貢等監生

入監復監者除水程及舊例外再寬一月若患病有堪信文憑者除舊例外亦寬一月此外再有過限俱行送問如此則人情得通監規不廢上從其議夏四月庚戌命南京刑部尚書戴珊子晴入監讀書六月舉人監生留志淑陳璋俱告績聘畢姻勘實行之丙午命南京戶部右侍郎鄭紀子主恩入監讀書秋七月壬午舉人監生吳瑩入北監弘治二年守制日久不到弘治九年改南監至是始入班北監移文覈之其久曠日期前此未有也冬十月甲辰南京吏部以監丞

楊文使其義子安具告給假回籍省祭遷葬養
病一狀之內四事竝告難以施行劄行本監審
問十一月癸酉四川眉州民生吳度川成化二
十一年遇例詐冒州學生員往河南布政司納
粟送監依親回籍自首發學壓滿八年至是復
監肄業十二月戊子巡按直隸御史史載德以
闕里

先師廟災奏遣大臣往廟祭告行兩京堂上大臣
各謹天戒司教化者尤宜進修德業訓誨生徒
上是其言甲午陞致仕祭酒謝鐸爲禮部右侍郎仍

管國子監祭酒事辛亥命南京大理寺卿楊守
隨子茂恕入監讀書

曠弘治十三年春正月辛巳命都察院右副都御
史高銓子本入監讀書秋七月丁丑命南京故
禮部尚書童軒曾孫時入監讀書冬十一月乙
亥博士趙克寬當考滿以督造歲報生員文冊
仍支俸管事待完日給由十二月甲申命都察
院右副都御史李田子承階入監讀書是年令
監生不許依親

醉弘治十四年春正月己未命太子少保禮部尚

書兼翰林院學士彭華子勉敬補廕入監讀書
華長子勉敷入監未霑一命而死故也二月南
京禮部申明監生給假舊制自弘治十三年以
後監生入監不放依親者除三年省親照依舊
制外其有告回畢姻及搬取者務要坐監半年
之上照例定限放回如過違限期照依洪武年
間事例施行凡違兩月以上者送問續該山東
等布政司陸續咨送到搬取并省災監生劉璣
等俱違限兩月之上送法司治之三月庚戌北
監官生林廷杓王資隨其父任南京改入本監

肄業廷杓吏部尚書瀚子資戶部尚書軾子也
乙卯命南京兵部右侍郎潘蕃孫儒入監讀書
乙亥祭酒劉震卒南京吏部右侍郎楊守陞署
監事震字道亨江西安福人成化壬辰進士第
二人居嘗以及第自負不喜讀書而頗近利士
論頗薄之夏四月己卯國子監管祭酒事禮部
右侍郎謝鐸因地震建言維持風教事臣愚竊
惟人倫風教所先人倫不可以不明也臣願正
祀典以究明倫之實仕途風教所繫仕途不可
以不清也臣願重科貢以清入仕之途冗員風

敎之濫冗員不可以不革也臣願革冗員以從
京府之制捷徑風敎之着捷徑不可以不塞也
臣願塞捷徑以澄國學之源臣知天下之事所
當言者不止於此惟是四者事關風敎風敎學
校之首務也用是條列于左惟

聖明加之意焉臣惟學校之設所以明人倫也人倫
莫先於父子子雖齊聖不先父食顏曾思三子
配饗堂上而其父列祀廡下有是理哉莫若別
於闕里立廟祀叔梁紇而配以顏路曾皙孔鯉
庶幾各全其尊而神靈安安矣人倫莫大於君

臣吳澄親爲宋之遺臣而覲顏胡元之官祿名節掃地復何言哉宜斥其用夷變夏之罪罷黜從祀以列於莽大夫之列臣亦嘗言而未蒙俞允乞勅禮部翰林院議處則祀典正人倫明矣科貢之設皆所以羅天下之賢才而用之也科舉雖稱得人柰何考試等官皆御史方面之所辟召恩之所加勢亦隨之於是外簾之官預定去取名爲防閑實則關節乞令大臣舉部屬等官素有文行者以爲主考庶幾前弊稍革歲貢一途類從姑息凡願授教職者先送翰林院國

子監按月考試期年之間擇其果通三場者方許

陞考授以職事庶幾教官亦不至甚濫矣京國四方之極天下視以爲準者也順天應天二府大興宛平江寧上元四縣皆爲附郭學校惟二府有之而四縣不設亦以府學生徒皆四縣之俊秀也不然豈以首善之地而惜此一學校之官哉柰何天下附郭俱各有學其視京府實爲冗濫請從順天應天之制凡附郭縣學止以府學教官兼領其事則冗員稍革矣近年以來大開

捷徑如納馬納粟之徒卽他日之鬻爵賣官豈
盛世所宜有哉今邊事方殷必有以此策獻者往
年爲因此輩不諳文理凡撥各衙門者俱各雇
人今遂視爲定例致使六科短差亦以雇人艱
難爲辭目前流害其極如此乞照內府等衙門
事例許以年月相應者送科寫本亦令掛選出
身庶幾嗟怨少息而風教之地亦稍清矣

上從其議遂行本監庚辰命都察院右都御史張淮
子儒卿吏部右侍郎葉盛孫夢淇南京都察院
右都御史陳道孫雲松入監讀書秋閏七月辛

已命南京太常寺卿呂憲子言入監讀書八月
辛亥吏部奏以南京九卿爲災異陳言其議南
京差撥監生於內守備處十名并六科十三名
半年一替俱爲雜歷宜比在京司禮監及六科
事例一年爲滿且兩京國學先因坐堂人少差
撥不敷以此增貢增歷今南監坐班見有一千
四百餘名差撥有限比之北監誠爲淹滯況寒
士久寓他鄉衣食缺少至有乞丐自刃不能存
活者大辱風化有傷和氣乞量爲疏通漸減歷
事年月少紆士困待一二年後仍復舊規又查

得在京司禮監辦事監生與內承運庫寫本者俱准爲正歷而近日北監又題稱六科短差監生乞照內府事例亦以一年爲滿准作正歷附選自今以後照前事例便得及早附選出身亦仁及士類之一端也

上從之癸丑以致仕福建按察司僉事章懋爲祭酒時懋於二月已居父喪守制兩上疏辭以原職致仕

上命懋服闋赴任九月庚寅署監事南京吏部右侍郎楊守陟考滿奏准祭掃令監丞林啓署監事

辭廟解印詩攝官首夏朔初來解印高秋望始
回漸負菁莪時雨化肯教紅杏倚雲栽宮牆數
仞趨庭別省部三年報政催六館冬十二月辛
師儒情戀戀篇章珍贈更傳杯

酉監丞林啓坐失火提問博士趙鉞代署監事

壬戌弘治十五年春二月丙辰命戶部尚書沈固孫

志入監讀書戊午丁憂違限起復監生潘傑等

例當充吏以有患病保結聽其復監三月丁卯

北監官生李珏奏改入本監從之夏四月戊戌

兵部尚書孫原貞孫昇戶部左侍郎孫仁子綱

俱乞恩補廕入監從之庚申以翰林院編修羅

欽順爲司業署掌監事先是陳敬宗擢祭酒後

司業久已不設至是

上方銳情教化以輿論謂太學之師宜無若章懋者
因懋辭免不允命待服闋到任管事乃復設司
業以欽順爲之欽順旣蒞事卽奏修廟學五月
癸酉命南京通政使司通政使毛倫子暉入監
讀書秋七月壬申令監生告搬取者得比畢姻
例限二閱月不作虛曠冬十一月庚午朔監生
曹祥等言北監監生多有設計托故告改南監
增稅年月彼此影射以圖速撥者因訐吳天挺
等多有情弊於是移文南京禮部轉行北監查

勘遂以爲常是年令正歷一年零三月者減三月長差三年者減一年監生有願告依親者仍照舊例放回

癸亥弘治十六年春正月甲午撥歷監生有預知繁劇門有歷缺輒稱病給假以待後撥者奸計得行人思倣倣今後於臨撥之期審覈給假委果在先仍勘實患病不能動履衆所共知許今在監醫治以需後撥如臨期推病真僞難辨則循次撥歷以抑僥倖之萌具呈南京吏部劄仰隸行三月南京吏部右侍郎楊守卬子茂清太常

寺卿陳音子須孝自北監改入本監肄業夏五月命禮部尚書倪謙子山都察院右都御史洪鐘子濤入監讀書秋八月庚子祭酒章懋到任

上謝

恩疏

臣先於弘治十四年六月內欽蒙

聖恩

臣先於弘治十四年六月內欽蒙聖恩陞臣前職臣以遭值父喪例應守制及才德淺薄老病衰頹弗堪重任兩具奏牘祈免陞職

又兩承

聖旨允臣終制而不容遜避

恩

厚命嚴臣不敢有違已於弘治十六年八月初六日到任管事訖伏念臣素無實學謬忝虛名始列近臣而論思無狀繼遷憲職而善最弗聞每愧非才而竊祿途緣多病以乞身仰荷鴻私獲全素履自退栖於環堵已夢斷於釣天豈意餘年復叨殊獎恭惟皇上恩同天覆德與日新法克舜之知人致文王之多士既宏大業尤懷遠圖謂賢才為致治之基而監學乃育

材之地欲臻漢室橋門之盛久虛周官師氏之
員宜求儒碩以造就俊髦乃起衰庸而攝承闕
乏雖抱赤心而欲奮其如白首以何堪人言遭
際之非常臣懼寵榮之過分拜恩跼蹐就
職凌兢臣敢不磨礪已灰之心溫尋久廢之學
以安定之經事爲教非陽城之忠孝不談勉修
職業仰副憂勤但虞曠敗有誤明揚尚祈早
賜歸田庶不久妨賢路臣不勝感恩激切戰慄
待罪之至冬十月丙申南京尚寶司奏言本司短差
監生二名半年一代不作正歷乞照在京尚寶
司及南京六科事例一年滿日附選從之是年
歸監丞濮琰之喪琰當塗人係籍京師甫抵留
都而卒編修韶父也士夫皆厚賻焉

甲弘治十七年春二月甲午都察院右副都御史

張浩奏乞以其子文貴入監從之三月祭酒章
懋奏修舉學政曰古者太學所養皆天下之俊
秀其資既可與共學其學必抵于大成故人材
盛而風俗美也我

國家稽古制治尤重太學以敦化原洪武永樂年
間太學生徒動數千計類多少俊而教育之法
至爲周詳計日以通經積分以出仕布列庶位
大抵得人近年生徒漸少今科貢兩行共六百
餘人其歲貢者非無可與共學之資而衰遲不
振十常八九誨誘雖勤不無扞格近用三百五

十名清理黃冊除別差之外盡撥止及前數之半而堂舍頓空每班惟舉人三五名而已其舉人南京禮部劄付開送新舊共該六七百人又多顧戀家鄉不肯到監罰雖嚴於違限彼亦視爲泛常將及會試方來告送逮其下第又復還鄉因循歲時坐成老大其間固有厄於貧難而安於小成者亦不少矣夫歲貢之入監旣由挨次舉人之坐監又每後時故差撥常患於不敷教養尤難於見效本末胥病官使乏材有養士之名而無得人之實此臣之所甚懼而夙夜不

寧者也臣愚欲行選貢之法不分廩膳增廣生員今提學憲臣精加考選務要行著鄉閭學通經術年富力強累試優等者乃以充貢通計天下之廣約取五七百人分送兩監今年首行一次以後或三年或五年量在監人材多少間一行之更乞自弘治十八年以後會試下第舉人該送南監者寬其違限之條要以坐堂之實如係初到人數須令實坐堂一年之上方准起送會試如係復監人數須令實坐堂二年之上方准再送會試非有父母之喪而不及期者不准

起送如此則生徒之數可以漸及往年且多精銳可進之資鮮成因循自誤之悔臣雖不知所以爲教然亦安敢不盡其心勤用提撕嚴加程督稍做積分之意用申激勸之方務令文行兼修政教粗舉成材有望附選及時豈惟差撥恒充固將官使克稱庶乎

國家收養士之效而臣亦少追尸素之愆矣

上命禮部議之夏閏四月庚午禮部奏據本監每歲監生取撥歷事寫本科差共二百六十六名雜差各衙門看表刷卷晒晾及堂友長等又該一

百五十名其餘舉人又告會試人少差多撥用不敷合將今後歲貢生員願就教職者照舊送南監肄業按季考試果有能通三場而實係家貧親老者方許起送若

陞考取中則選用如不中仍送復監肄業照例撥歷則不至乏人矣

上從之時監生多奉

詔照舊例放回依親祭酒章懋乃復奏言本監見在歲貢監生四百餘名除有別差及量留聽撥外過湖查冊者止及一百八十名尚欠一百七

十名已行南京禮部將先年放回依親撥取養
病送幼子等監生各行取回至今到監者十無
一二南京戶科給事中等官李光翰等節次催
取添撥過湖委實人少難添未免有妨公務乞
將今年新貢生員凡附近南京地方人數盡行
送發肄業誠恐畏避過湖到監之後人皆循例
告去須令經歷過湖短差六閱月滿日復監待
後查冊事完仍依舊例

上從之壬午

上以近來內外弊政多端軍民受害以致上千和氣

命各該衙門查議奏聞於是懋復奏言法無古今便民者爲良法論無臧否利民者爲至論今政出因循事多積弊臣固未敢出位僭言也故就職之所及者而論之一曰歲貢諸生始得廩必二三十年而後貢迨入監遠者十餘年近亦三五年而後撥歷歷事又一年而掛選已及五六十歲又待選十餘年而後得官則其人已老多不堪用因而死亡者亦不少矣是

國家虛費廩米數百石以養一人而不得其一日之用豈不重可惜哉必清之於學校責令提學

憲臣嚴加考選凡材之庸下年之老邁不堪作
養者不許食廩充貢次清之於國學照依先年
命大臣揀選之法凡材之庸下年之老耄不堪
任用者不容在監待其掛選之時吏部就行考
定高下或賜冠帶或授合得品級散官使之待
選於家而行各處巡撫巡按分巡分守及司府
正官凡有公事委之幹辦既可使之習於政事
又可驗其能否歲終開具幹辦實跡第其高下
造冊奏

聞其材識優長卽行取選年老無材不堪用者就

令致仕況洪武中嘗差監生各處丈量田土亦
欲驗其能否而授職也明試以功如此則官使
得人而民皆受惠矣此賢愚同滯之弊所當革
者也二曰成化初年本監止有博士三員助教
十員學正學錄共七員耳今諸生不過四五百
人而教官乃餘三十員會饌久停而掌饌乃有
兩員似乎過冗冗食不節國用虛矣又況近奉
新例風憲有缺許於博士助教等官內選補則
此各官者不惟風教所係抑乃風憲之儲尤宜
慎選不以備員爲貴也所宜裁減如成化初年

之數後遇缺員行令巡撫巡按提學等官推選
學行超卓教誨有方者舉奏以補其缺庶幾用
不失人既有以佐風教而備迪簡員不至冗又
可以寬民力而紓國用矣此冗食之弊所當革
者也三曰本監官吏俸糧及監生家小月糧俱
給糙米師生會饌乃給白熟米每歲預先會數
呈南京戶部坐派蘇常等府解納本色近判到
弘治十六年分析納糙熟米三千八百石計銀
二千六百六十兩不分糙米熟米俱作七錢一
石臣查得南京部院等衙門官吏監生俸糧近

俱折價每石銀七錢今俸月糧糙米亦作七錢
一石折納委實事體相同經久可行惟有饌米
亦按月關支每人多者不過三斗少則七八升
或三五升若將銀兩碎分不免虧折之患又後
湖查冊監生數多所有饌米乃日用不可缺者
雖云有銀可糴而米價貴時熟米一石不止七
錢欲從本監糴買供應又不免陪補之患若止
將銀兩送湖則湖上亦費區處臣愚見此項糧
米只合收受本色已行具呈南京戶部定奪該
部稱係巡撫奏准事例難擅改移但恐遂爲永

例則二患未有已也乞將俸糧月米折納價銀使民獲輕齎之便其饌米仍納本色則官免虧折陪糴之患此則預防其弊官民兩便之事也四曰本監舊額膳夫一百名皆應天府所屬各縣編審均徭人戶充役爲因節有逃亡不便成化二十二年始行改派蘇松常徽寧國五府每名一年解銀一十二兩有閏加一兩以充雇役之用自文廟六堂及博士廳并內外各號看守灑掃及雜用工役共雇七十餘人該用工食銀四百五十餘兩其餘分派各官及本監一應公

用如辦納內府浣衣局濕小粉等項皆於此取
納先任祭酒劉震頗嘗積有贏餘奏准修理號
舍訖自臣到任以來所收弘治十五年十六年
銀兩除雇人應役外比照北監見行事例止給
與博士助教學正學錄典籍掌饌職卑祿薄官
員各一名共用三十二名其餘公用隨宜節縮
亦頗有餘均給六堂監生俱有文案簿籍惟是
未經奏請於義未安今弘治十七年蘇松常三
府共該膳夫七十名每名止解銀十兩來文開
稱巡按馮御史議處事例而徽寧二府仍照例

解發多寡不齊欲便聽從輕減以寬民力義無不可但亦未經奏請未敢擅便定奪又今後湖查冊例該兼撥膳夫徒夫到彼供役緣法司近年間擬囚徒並無一名到監無從差撥已曾具呈南京禮部轉行取撥而法司回文須要申請方准撥送以此盡用前項銀兩多雇人役前去供應但恐從此遂廢舊規未便如准部查議前項膳夫應該納銀若干通行各府遵守庶幾事體歸一仍行南京法司照前問發囚徒送監應役庶使百年成規不至隳廢所有前項膳夫銀

兩除雇役外給與博士等官各一名及公用或有剩餘合無均給諸生惟復用以修理公廨或刊補書板亦乞斟酌所宜立爲定制以便遵守仍將收支數目明立文案隨卷照刷以防奸弊庶幾財無妄費民免重困此又革弊恤民之一端也五曰本監會饌乾魚每年預先會數呈南京戶部行湖廣布政司坐派各該河泊所辦納豬肉則三月一次會數行應天府都稅等司辦納行之歲久積弊多端當魚貴時則輸納後期而支用多缺及魚賤時則一年併至而給散有

餘堆積在庫一經暑雨則臭腐潰爛化爲灰土
人不可食不無暴殄天物其饌肉每當暑月送
納之際亦多臭敗退換則買補不便收受則日
用不堪彼此皆以爲患本年五月內據應天府
都稅等司連申自愿折納肉價銅錢行據各班
堂友長以爲兩便臣查得國子監通志監生每
人每日乾魚二兩而本監案卷數十年間止是
三日二兩又查得北監有給錢鈔事例饌肉亦
係折納乞

勅該部從長計議卽今在庫腐魚數多從每日二

兩之例分給以後各該河泊所歲辦乾魚酌量
中價止令折納銀兩則民免裝運輸納之費而
在官亦免堆積腐壞之患其饌肉每年自四月
初起至月終暑熱易敗之時照依時估折納銅
錢庶得官民兩便此事雖無關於大體實亦積
弊之不容坐視者也

上悉嘉納付所司亟行焉自是膳夫通行解銀一名
十兩秋七月辛丑命南京刑部右侍郎熊懷子
輔南京兵部右侍郎黎福子昭都察院右副都
御史張誥子文貴入監讀書八月聽舉人監生

張紘等告改北監九月祭酒章懋自陳年六十
有八老病乞放歸田里不許冬十月戊午朔用
北監祭酒謝鐸言令歲貢生願就教職者附監
肄業一年考通三場果堪師範方許附選南方
人就本監者往來水程仍准在一年之內壬戌
舉人監生湛若水告久棄功名自燬引試以四
書義及論文理可取乃許告會試十一月司業
羅欽順奏乞給假送父還鄉從之復奏乞終養
不允祭酒章懋送行序少司成秦和羅先生允
升由內翰來官南離卽迎其嚴君栗齋先
生以就養既二載而栗齋以桑梓久違松楸在
念有歸志焉先生則以栗齋高年遠涉江湖而

二季皆官于外乏人侍養乃疏請于朝得賜
假送親南還太學諸寮屬以爲先生是行寔關
世教之重非但爲家慶之榮也爰各賦詩以並
其行謂某於同官有一日之長也俾爲之序嗚
呼天下有至德要道得於降衷秉彝之初發於
良知良能之天體之身而身修行之家而宗齊
推之國與天下無不治且平焉守約而施焉書
其惟孝乎先王庠序學校之設皆以申明乎此
而司徒六行師氏三行之教必先乎此其朝夕
從事於詩書者所以講求乎此肄習於禮樂者
所以節文乎此而樂乎此也士之所以爲學豈
容外此而他有所事乎特患所以教之者無其
本耳昔唐陽城以其孝友薰襲里閭及爲司業
而教學者以忠孝有三年不歸省者斥之由是
群生聞禮後學知孝而忠義之士若何蕃輩皆
出其門國家卒有賴焉謂非本之身教而致然
耶今先生以詞林魁彥膺師儒之任其教道之
善職務之修立身揚名以顯其親者固無不至
而迎養其親於是也朝夕左右夔夔濟濟慄先
承志以悅其心非徒肯甘溫清以奉口體而已

茲復親導守安輿歸故里則所以尊其親者又

聖天子

天子屬精政理圖任責成凡

有加以焉今群臣以他事乞歸者皆莫之許而於先生待養

之奏卽允其歸豈非欲以孝治天下而重先生

之身教乎先生行矣戲綵高堂薦羞先龍靡有

不孝自求伊祐竣事而未陰感默化則濟濟多

士寧無克廣德心而興於孝弟者耶殆將有德

有造不肅而成必有若君陳張仲者出而繼于

天子以彌成孝治視彼陽城之生徒斤斤皆循

法度者不足言矣某也親既沒而年已邁孝有

不及弟有不時欲爲先王之行不可得徒切慨

嘆無足爲教願因先生之教有成而幸逃尸素

之責焉故書此簡

首以道吾私云

是年奏過湖監生查冊一月

者推算坐班兩月不果行

弘治十八年春正月管冊給事中李光翰等奏

准清黃冊監生如有抗拒不服許監臨官徑

自叅送法司問擬如律二月本監自去歲終實在監生一千九百七十六名見在肄業官民生止有五百三十七名奏乞照先年奏准事例乞勅禮部轉行直隸及各該府州縣等衙門清理自成化八年始舉人歲貢乞恩納米等項監生凡經入監者備開脚色其已中進士及願就教職併病故問革者查審緣由報作開除其見在坐監告回丁憂養病依親畢姻等給假者催促復監報作實在其有不願出仕及年老廢疾者照例冠帶閑住亦與開除造冊送部轉發本監查

照以後每遇朝覲之年照例行之然所司因循不行造報竟無有至者夏四月祭酒章懋力求去位疏上不允五月又乞照例休致不允壬寅毅皇帝卽位秋八月命禮部右侍郎兼翰林院學士劉定之孫壽南京禮部右侍郎馬廷用于仝戶部右侍郎顧佐子仲諧入監讀書冬十二月祭酒章懋陳言治道大畧要務謂紀元以正德爲名當求其實必如漢董仲舒所謂正心正朝廷正百官正萬民而後謂之正德必如唐劉蕡所謂居正位親正人發正言行正道而後可以正

德臣已具疏乞骸將歸死首丘而犬馬之誠耿耿不能自已敢以正德之所當務者條爲五事
一曰勤聖學二曰隆繼述三曰重詔令四曰謹大婚五曰敬天戒

上優詔答之是年以廟學損壞已甚奏請修理不報
武宗毅皇帝竊正德元年春正月祭酒章懋引年七十乞放歸田不允二月南京戶部尚書樊瑩奏乞以其次子望補廕從之夏五月命南京兵部右侍郎羅明子雲鳳南京光祿寺卿胡諒子銳入監讀書秋八月祭酒章懋三年考績乞恩致

仕不允遂歸蘭谿

丁卯正德二年春二月己丑南京吏部尚書王華子
守儉自北監奏乞隨父任讀書遂改入本監三
月癸酉章懋以考績公文呈繳吏部乞恩養病
許之以河南提學副使王敕爲祭酒夏四月行
取助教張祐擢監察御史秋七月吏部以司業
羅欽順侍親與事例不合仰催復任遂還監尋
以三年考績送部劉瑾勒令爲民

戊辰正德三年春二月養病祭酒章懋懇乞致仕許
之冬十月舉人監生潘文明等告就教職臨試

稱病發本監肄業

已正德四年春二月令監生告假畢姻者准依親
不在存留之數放傳延等三十人畢姻夏六月
祭酒王敕免敕字懋綸山東歷城人成化甲辰
進士及第授編修坐浮薄傾險貶夷陵州判官
累遷至提學副使嘗著五經通旨以致名譽及
爲祭酒頗納賄被論免官歸敕善風角習堪輿
推驗多中人遂以博極群書稱之夏四月開納
粟實邊入監讀書之例秋七月丙午以南京翰
林院侍讀學士石琚爲祭酒九月遣學錄蔣相

齋進慶賀長至

表箋以吏部行取遂改遣學正廖編閏九月平涼
府知府田暘子進士蘭以結親王府黜爲民吏
部通行本監冬十一月丙寅聽查對軍冊監生
凌潮治疾先是南京禮科移文以潮詐病偷安
遽告本監欲其更替效尤成風漸不可長祭酒
石堦令典簿覈果真疾乃答以潮既不獲伸訴
於所司又不得聽理於本監隆冬興疾往來控
告萬一重冒風寒致實軀命托有師生之分者
豈得視如路人邪遂免其差丁州再頒科舉定

式

庚午正德五年春正月壬戌令查訪納銀監生年歲
其有增減年數者許首告免罪令其改正於是
通拘張本等七百一十名到班面審取回鄉在
班監生造冊繳部癸未南京戶科行查隴驛監
生不到者詹垣等九人謂其詐病窺避移文本
監令五日一次於繩愆廳畫酉仍審取年貌籍
貫宿號歇家迭繳以備拘喚該廳官吏不違依
准送繳祭酒石瑄答以年假後復放燈假遵
高皇帝舊制俱免畫酉不敢有違自正統元年給事

中張佑奏准取撥監生五十名相兼人匠曬晾黃冊半年一換遇有事隨即取撥迄今垂百十年竝無審取各生親供之例竊意

祖宗愛惜人才禮數優異當時臣下奉行亦體

聖心故不忍以胥徒納戶一例相待迄于今日莫之有改本監不敢妄爲紛更擅自創例雖稱振作實亂

憲章事遂寢三月乙丑用吏科都給事中李憲等言追奪罷謫官員大學士劉健謝遷尚書馬文昇許進韓文等封贈誥勅移文本監知之夏六

月巳丑北監納銀監生楊謙等告入本監禮部
查無食糧年月仍照二十四歲以下事例寄監
放回原學讀書扣年二十五歲以上復班秋七
月丁巳改祭酒石瑤爲北監祭酒丁卯下減廩
之令以禮部言在監人數已多而本監倉糧甚
少欲得疏通人材節減廩餼

上從其言令正歷遞減四閏月寫本雜歷各減兩閏
月長差遞減六閏月已撥出者照例扣算已而
俱不准減歷八月以人材壅積令放回依親歲
貢者一年援例者五年方許行取復監九月停

放回依親之令北監祭酒王雲鳳言本監盡行
放回依親則該坐堂者舉不過七人貢不過十
三人是國學養賢之地科貢一空况近日減歷
之恩專及於納銀之人吏部數年以後選用既
無科貢之士必多曳白之徒居官治民年少不
經其於治體能無大損

上從之遂行本監癸未以北監司業王璣爲祭酒冬
十月壬子司業羅欽順起用復原職癸丑復減
歷之令先是太監劉瑾憾諸生不詣門致謝行
未一月輒罷之瑾旣誅監生馬鉞等疏其擅改

成命於是復焉其見坐監者不分自備柴米俱
准食糧已放歲貢生悉令行取未放納銀生員
照前例自備柴米寄監讀書十一月甲寅都察
院副都御史徐源孫勲以年出幼復監辛未歲
貢監生程道奏以禮部尚書陳玉等奏准歲貢
與納銀監生均平相兼撥歷納銀監生蘇貴奏
請照舊制監志以年月深淺挨撥禮部請行兩
監作叙人數如果兩途相平該撥十人照例以
三七爲準如西序稍多則科貢六人納銀四人
永爲定式從之

辛正德六年春正月己未奏查裁革官員本監准
今添設司業甲子南京禮部移文本監撰述慶
賀

皇上尊慈太聖康壽太皇太后慈壽皇太后表文祭酒
王瓚以非奉

旨意不得撰述答之部復查有成化二十三年舊
規本監乃與南京翰林院公同撰述三月己丑
歲貢監生馬從誨等七人告授冠帶榮身不許
令復監肄業己丑

賜祭酒王瓚誥命奉

天承運

皇帝制曰國家肇建兩京竝設太學生徒教育兼南北之英才館舍列居合古今之制度乃眷師儒之元長允資望實之素孚簡求旣稱于朕懷褒寵曷拘于恒典爾南京國子監祭酒王瓚學邃行醇才高識遠進繇魁彥出際昌辰首躋禁從之班久列編摩之任經筵侍講非仁義不陳藝苑校文必純雅是取儒猷丕闡朝論翕歸肆佐教于成均遂揚休于師範載膺顯陟特長南靡乃能統領紀綱表率僚屬規模正大初不尚乎

朴刑義理精明式克傳乎經術士樂龜山之化
頓革澆風人稱申國之賢終當大用屬茲慶賚
誕布殊恩可無寵名以示褒勸是特進爾階朝
議大夫錫之誥命嗚呼道德所以沃君心朕實
未忘于舊學教化所以興治道爾其益振于前
功勉副訓詞嗣膺殊寵欽哉

壬申正德七年春正月以刷卷查冊撥取人衆廩膳
不敷移文戶部都察院議處增用二月以翰林
院檢討穆孔暉爲司業

癸酉正德八年春三月命刑部尚書劉纓孫遺南京

吏部尚書張灤子概兵部左侍郎呂獻子仲景
入監讀書秋七月壬午裕州同知郁采死於流
賊

詔贈光祿寺少卿廕其子狎行監寄簿至是守制
已滿復監肄業八月辛亥復歷事舊例北監祭
酒石瑤言正統景泰間西北用兵糧儲乏少廩
餼不繼暫令減歷今則坐班人寡不敷差撥宜
照先年事例照舊歷滿方與起送撥補仍申嚴
復班限期不使冒送問之法杜絕官醫保結不
使長欺僞之風則士有定志人得專業旣無欲

速之弊亦消見利之心六館不至於乏材諸司亦足以濟事矣從之於是令南京以文書至日凡未經歷滿起送者正歷并寫本雜歷各一年長差二年俱滿日撥發更替仍催促依親在家納粟年及二十五歲已經行取者嚴立限期送監其行取已過三年之上別無丁憂患病盜賊阻滯并爲事未結等情及已給文而捏稱在家及沿途患病無有官醫保結過違批限一年之上者俱照前例送問九月庚申改祭酒王瓚爲北監祭酒瓚字思獻浙江永嘉人博學雄文衮

袞數百言弘治丙辰進士及第歷編修侍講乃
轉北監司業至今官爲人坦直醇厚未嘗歛怨
北監諸生愛戴之吏部遇員缺以瓚及春坊左
中允賈詠名上瓚被

命之日北士甚悅後遷禮部侍郎改任南京卒贈
尚書冬十月改司業穆孔暉于北監十一月甲
寅南京吏部右侍郎羅玘等奏言議處撥歷以
甦士困南監人材比北爲多南京撥歷比北爲
少故監生坐堂致有四五年之久者不無抑鬱
之歎請暫添歷吏部議以南京正歷暫添二名

雜歷暫添一名照例考勤及歷滿上選待後納銀監生將次撥盡之日仍復舊規

上從之丙戌南監祭酒員缺吏部推舉南京太常寺少卿羅欽順春坊右諭德兼翰林院侍講倫文叙

上命再推乃以翰林院侍講學士吳一鵬春坊右諭德南京翰林院署印管事豐熙名上

上簡一鵬用之十二月甲寅以翰林院檢討汪偉爲

司業

檢討易舒
誥同推

甲戌正德九年春二月壬子南京吏部右侍郎楊守

耻子茂深奏言臣父守耻侍從

皇上於東宮侍讀比之吏部侍郎張元禎太常寺少卿楊時暢等俱春官舊臣先後各蒙廕叙於是命茂深送監讀書冬十月癸卯行取依親監生時給事中王良佐田荆王鑾各上疏良佐言上粟監生有妨科貢欲停止之荆言廩膳生員年老學充不得登第淹滯可憫欲得開貢入監其歷滿依親者量給廩餼以資窘乏鑾言廩膳生員年四十五以上者起貢入監五十五以上者冠帶榮身吏部議以三疏勢俱難行惟今盡數

行取科貢援例監生以實國學歲貢援例給領
文引及服滿赴部除水程違限一年之上者雖
有患病公文亦不准理定行送問其舉人有將
及會試方纔至部者雖准入場試畢仍行送問
援例者年未出幼照舊依親候年二十歲以上
方准起送復班庶舊制不失而國學亦不至於
空虛

上從其議十二月陰南京戶部尚書胡富子韶入監
讀書

乙亥正德十年春三月禮部尚書張駿孫明憲乞恩

補廕從之夏四月恩生丘鳳喈父喪守制少二十日送問治罪工完復監肄業秋八月江西瑞金縣知縣萬琛與流賊對敵被戮死

詔贈琛光祿寺少卿與祭一壇仍附祭鄉賢祠廕其子麒入監讀書九月廕右副都御史張淳子相入監讀書冬十一月以祭酒吳一鵬爲南京太常寺卿

丙子正德十一年春正月戊申以北監司業魯鐸爲祭酒夏四月癸丑南京禮部奏言近准禮部咨舉人下第給引赴部送監竝無違限之條昔呂

希哲遊太學得師程頤遂問性理之學胡安國
遊太學得於靳裁之啓發爲多可見太學不可
以不遊也豈以登一第而可緩哉宜擇違限一
年半以上者送問以懲之其坐監監生點名不
到私回原籍者除行文提解外如果未回原籍
一月內告到者徑送本監治以監規若在一月
之外告到者計其原籍道里遠近可以往回者
竝以越關送問其原籍尚遠月日未及者送監
痛治壓撥凡言送問雖有患病公文竝不准理
在監聞喪丁憂起復違限者例該引奏發落其

丁憂守制不計閏二十七月守制少者送問多者及無聞喪服滿月日例該行查若復監者必給本布政司批文如路不由本布政司許給本府批文南北直隸俱要本府批文若該給批文於府而止給於州縣者叅提官吏問罪回報仍復行查皆遵舊行也今後監生養病二年半之上到部者亦合行查凡言行查俱暫發肄業果有違礙竝行送問其因省親畢姻送幼子取家小等事在家丁憂者舊要原籍官司公文開稱緣由一年之內到部謂之預申有則爲之行監

異時撥歷准其加丁與實在監者大畧相同其
無預申或在一年外者竝作虛曠夫居喪讀禮
凡百廢絕古者臣有大喪則君三年不呼其門
况當哀戚之初而乃驅之營求文移計較利鈍
此何理邪昔陽城爲國子司業引諸生告之曰
凡學者所以學爲忠與孝也若此者謂之教人
以孝可乎自今革去預申當其服滿到部但有
公文結狀丁憂明白卽與加丁撥歷不作虛曠
已上乞著爲例永爲遵守禮部駁之曰監生依
親行取復監違限一年之上及給假省親畢姻

送幼子取家小等項違限兩閱月在家丁憂服滿違限七閱月者各送問俱係舊例今欲將給引送南監歲貢援例及在家丁憂服滿監生亦違限一年之上并下第復監舉人違限一年半之上者俱送問夫科貢援例均爲監生行取服滿違限則一宜悉照前例違限一年之上者通行送問其坐監監生查得國子監見例點名不到私回原籍日久者呈部行提日近者照依監規痛治計日壓撥今除不到日近者照依監規外若已經呈部行提之後告到月日雖有久近

其不守監規一也今擬行提之後一月之內告到者仍送該監依例痛治計日壓撥若在一月外告到者不拘月日久近曾否回還原籍通行送問雖有患病公文亦不准理庶幾事體歸一矣監生丁憂起復違限并守制月日多寡及行取復監止給本州縣公文已有引奏行查舊例其監生養病年久到部恐是托故遷延本部舊亦行查但無畫一限期今奏要定擬宜令今後養病痊可監生除往還水程外扣至三年之上到部者俱暫送肄業行文原籍官司查理候無

違礙方准撥歷若有別故仍行送問但有行查
監生俱照此例其依親并給假省親等項在家
丁憂監生舊有預申事例蓋以禁防詐冒固不
止爲撥歷之據若依親者旣已行取給假者旣
已過期遇有丁憂事故動經年久不能復監使
非申報本部知會恐亦於心未安但申文到部
一年內外似不必拘今後預申雖在一年之外
者亦與准理若官司失於不知一槩行查往復
不便亦聽該部臨時查照起送公文准令同鄉
京官保勘庶幾詐冒不容人情稱便矣議上

上以爲然秋七月歲貢生員韓勛奏言故祖副都御史雍有兩廣軍功乞廕武職

上命送勛入監免其坐班歷事量除在京文職雍事功年遠勛一旦受廕前此所未有也八月南京兵科清查陳言軍冊取撥監生十五名比例具奏准作實歷九月改祭酒魯鐸于北監冬十一月以南京翰林院侍講學士賈詠爲祭酒十二月廕死事蔣璣子朝陽入監讀書乙丑湖廣違例多收納銀生員王承龍等五十六人奏乞聽其接濟採木仍准入監從之

正德十二年春二月祭酒賈誼奏請修理廟學
不報乃率諸生倡義興工秋七月辛丑吏部奏
以南京戶科給事中易璿等言過湖查理黃冊
監生滿日往作實歷事三閱月其餘九閱月於
各衙門歷事輟補完日送部附選給引回籍聽
用揆之情法相應從之於是南京吏部劄行本
監如遇取撥有曾經過湖查冊者卽於各生坐
堂年月項下開註過湖月日若干該歷事輟補
月日若干亦明開未經過湖例該全歷字樣遂
著爲令八月廕北征死事刑部右侍郎丁鉉曾

孫傳入監讀書冬十二月以湖廣水災開上粟賑濟之例

歲正德十三年春正月壬戌祭酒賈詠奏乞比照兩京行人太常博士及府州縣行取事例凡遇風憲及兩京部屬有缺移文本監擇取行實年貌才力相應者或一二人或三四人赴部擢用以勵其餘以復

祖宗崇儒重道之典吏部議以兩京助教博士等官曾經一考以上賢能素著者行取考選風憲此見例也宜行南監掌印官每遇年窮所屬助教

博士等官從實開報年歲明註文學才行開具
揭帖責令順差人役齎送本部查照以備斟酌
行取

制曰可夏四月命江西弋陽縣報功生員汪元罕
充監生五月廢大理寺卿任漢子采入監讀書
六月祭酒賈詠以守制去職秋七月丙午吏部
推舉本監司業汪偉及浙江按察司提學副使
劉瑞

上命偉爲祭酒八月再開上粟入監之例以備賑濟
收生員陸律等五百三十人九月會昌縣報效

生員文泮擒斬大帽山賊首從五人送監叙用
冬十月辛未北監司業景暘陳情乞恩改官便
養擢左春坊左中允管本監司業事十二月廕
工部尚書劉璋姪獻副都御史黃瓚子襄兵部
侍郎熊懷子輔入監讀書

紀正德十四年春二月監生周文全練炫俱丁憂
違限例發充吏禮部奏以文全有官醫保結送
監炫聽候照勘從之夏五月刑部尚書屠勳廕
子應埴應試中式補廕其次子應埈入監讀書
六月江西廣昌縣知縣張濬奏言刑部尚書何

喬新名德可錄乞廕其子承鳳入監讀書從之
秋七月吏部以急缺風憲行取本監助教楊林
李繼宗八月寧庶人宸濠已就擒

聖駕仍親征以威武大將軍鎮國公朱壽行幸南京
本監師生出郭朝見

上駐蹕太監王洪宅嘗微服過監前見所樹長竿問
左右對以

高皇帝時梟令監生有罪者

上曰彼豈敢重犯朕法邪亟除去之八月壬子監生
劉秉常應試中式補廕其子蕭入監讀書冬十

月贛州府學歲貢監生周尚文以擒斬賊徒報功

上命免其坐堂卽與附選廩膳生員林思恩則下歲貢一等仍送監肄業十一月三開上粟入監之例收生員傅仁等五百七十人

庚辰正德十五年春正月乙巳吏部奏准令公侯駙馬伯家敎書訓導按月各備將功課照例送赴本監考校九年到部行查違者究治冬十月

聖駕還京師

辟正德十六年夏四月

今上皇帝卽位詔嚴上粟入監之禁六月廡禮部左
侍郎王瓚子倓右侍郎顧清子應陽南京都察
院右副都御史陳璘子鉉大理寺卿陳恪子應
期入監讀書恪未經三年考滿蓋異數也秋七
月庚午考察在京庶官祭酒汪偉自陳致仕不
允冬十二月查對軍冊監生祝賢等奏乞比例
准作正歷附選不許

今上皇帝嘉靖萬萬年

南離志卷第四

戊寅萬曆六年春二月以司經局洗馬許國爲祭酒

左中允戴洵送許祭酒先生之南京序
太古之教莫盛於成周而周禮太學之官不繁
見獨師氏保氏大司樂掌教國子然師氏詔王
歲保氏諫王惡而大司樂之事王者之所謂成均又皆六
律六同五聲八音六舞之事王者之所謂成均又皆六
致物而成天下之化者也夫所教在國子而其
事顯詳於王者何哉孔子曰道之以德齊之以
禮王者制禮以一天下之執事以下逮於庶人舉
三公而九卿而百執事以下逮於庶人舉莫不
由於禮焉故中於禮則爲歲失於禮則爲惡歲
惡明而士之趨操係焉矣及久而和之以樂夫
是以精神流通血脉動盪而道德成也蓋王者
之世治與教爲一士未入學而其教素行故爲
之師者事不煩而教易成後世朝廷之上旣多不
能自抑以從禮其治始不免馳騫於刑法把持
之末而於所謂教化之責道德根本之事悉舉
而委之於學官治與教分爲二故士無循習之
素而爲之師者又不敢以及於朝廷之嫌惡

徒泛然舉其所爲道德者以語之士且慢焉而
不信其既也士皆扞格而難勝勞苦而難成無
復有所謂精神血脉之流盪而古樂於是遂廢
不講矣然則後世之教不行而獨以咎夫師之
不善誨弟子之不善率毋乃過歟吾友許維楨
氏抱忠信博雅之資而口侍講讀蠟有紹惡
有諫而朝廷之上少至於失禮蓋天下信之
久矣茲往而爲南太學而以將其所以詔於朝
廷者詔之吾見南太學之士將因其師而信
朝廷之無失禮也又將因其師而信其師之
非泛語也南太學之教其必有興起而異於昔
時者矣他日復修大同樂之職以述古昔化成
之極其端可俟乎維楨既受命將就道其門
人沈子季文嘗從余游於北太學謂余頗習太
學之事而謁余爲之贈言余故述古之所爲師
保大同樂者告維楨也而又喜維楨之將獨能
兼舉之也

庚辰萬曆八年春二月以祭酒許國陞太常寺卿管

國子監事

祭酒戴洵送太常許先生北上序也

周自文王始作豐邑興建學校以育人材其詩曰於論鼓鐘於樂辟離辟離者國學也鼓鐘者所以教也又曰豈弟君子遐不作人豈者強故之弟者悅安之也能使其所旅教者而終歸於悅安舍樂何繇馬故樂行而風俗定人材成矣故其詩曰濟濟多士文王以寧及武王遷鎬京而不敢不改不待詔告而四方自服故其詩曰辟離自西自東自南自北無思不服及其詩曰鑄京人材益盛累世用之而不能盡故其詩曰豐水有芑武王豈下仕詒厥孫謀以燕翼子教化之行至於服四方得人之盛至於安孫子而其機實始於虞業之下鐘鼓之間則樂之所為化其何如哉自王教微樂聲緩鐘鼓莞絃之精意不傳於後世而人材所就亦終不逮於古我國家定鼎金陵首建太學宸衷注向躬親御奉闕雅樂之舞辨金石之音暨定都北平復建太學臨幸尤勤而典學之官每以太常行祭酒事蓋登歌協律之事寔隸太常卽古所謂大司

樂者也然樂豈專於六律六同五音八舞之謂哉直者使溫栗者使寬剛無使虐簡無使傲不事督責而徐調其不平之氣漸馴其不伏之心教者無勞而學者忘倦此樂之精意也得其意而行之則無俟虛業鐘鼓之陳而士心因悅以安矣此二百年來兩都得人而士心因悅以有以也治平之久偷靡萌生學官之條亦稍陵遲而留都舊地御幸鴻希士咸發激勵之心浸懈浸弛邇乃有貴游純袴之倫時逾禮溢制甚至扞文罔觸世禁屢肇言官之論於是議選精力之臣嚴察之長以蒞之而治教體異刑禮用殊向時積態未為衰止而怨讟逾甚當寧憂焉於是特命近臣穎陽許公輟講讀之業解侍從之事來董學政至則悉去煩苛修明舊典日引諸生親加誨誘飭儀端軌以身為先諸凡課督其藝能而約束其行檢者未嘗不出於禮也凡激勸其惰勤而節適其勞逸者未嘗不發於至誠也禮久而定誠積而孚貴游之氣銷純袴之習祛纖健不用夏楚無施師從容於上士服習於下蓋居之逾年而衆皆恬然趨熙然

遊信所謂於樂辟廡者蓋公之所爲教固已得
夫衆之精意而爲豈弟之君子者也於是天
子嘉之進公太常還之北太學夫留都固今之
豐邑也北都亦今之鎬京也而太常又雅樂之
所司也公往矣吾見四方之士將有意諭出色授
而自然敬應者矣他日兩都之士濟濟然出爲
天子用近以寧當世遠以詒子孫者非公誰爲
之乎不佞向嘗備員北太學於公之將北也不佞適
古大司樂之事以期公茲公之將北也不佞適
署翰林院事方樂觀公之有成績而又承乏得
從公之後愧無豈弟之德懼不足以奉公之精
意也聊復爲一言之贈如此亦庸以致景行之
焉思